


北史

			漢書門
三〇	四一	二八九	
冊	架	函	號


内閣文庫		
六〇	一三〇	漢書
函	架	冊

内閣文庫		
番號	漢	1289
冊數		30(19)
函號		280 85

正史百十九号
共三十本



綴じ部(喉部分)の文字など開きが不鮮明な箇所あり



武勸

列傳第十八

李弼

曾孫密

宇文貴

子愷

侯莫陳崇

子穎
崇兄順

王雄

子謙

李弼字景和隴西成紀人六世祖振慕容垂黃門郎父永

魏太中大夫贈涼州刺史弼少有大志膂力過人屬魏亂

謂所親曰大丈夫生世會須履鋒刃平寇難以取功名安

能碌碌依階以求仕初為別將從尔朱天光西討破赤水

蜀以功封石門縣伯又與賀拔岳討万俟醜奴万俟道洛

北史六十一
漢宗

國印

淺草文庫

大正早植
山田

直政
庫

淺草文庫

北史列傳四十八

王慶雲昏破之賊咸畏之曰莫當李將軍前也及天光赴洛弼隸侯莫陳悅征討屢有剋捷及悅害賀拔岳周文帝自平涼討悅弼陳悅令解兵謝之悅惶惑計無所出弼知悅必敗周文帝至悅乃棄秦州南出據險以自固是日弼密通於周文許背悅至夜弼乃勒所部云悅欲向秦州命皆裝東弼妻悅之姨也時爲悅所親委衆咸信之人皆散走弼慰輯之遂擁以歸周文悅由此敗周文謂曰公與吾同心天下不足平也大統初進位驃騎大將軍開府儀同三司從平竇泰斬獲居多周文以所乘騅馬及秦所著車甲賜弼又從平弘農與齊神武戰於沙苑弼軍爲敵所乘

弼將其麾下九十騎橫截之賊不爲二因大破之以功進爵趙郡公四年從周文東討洛陽弼爲前驅東魏將莫多婁貸文率衆至穀城弼倍道而前進軍士鼓譟曳柴揚塵貸文以爲大軍至遂走弼追斬貸文傳首大軍翌日又從周文與齊神武戰河橋身被七創遂爲所獲陽隕絕於地觀其傍有馬因躍上得免歷位司空太保柱國大將軍廢帝元年賜姓徒何氏六官建拜太傅大司徒及晉公護執政朝之大事皆與子謹及弼等參議周孝閔帝踐除太師進封趙國公邑萬戶前後賞賜鉅萬弼每征討朝受命夕便引路略不問私事亦未嘗宿於家兼性沈雅有深識

故能以功名終薨於位明帝即舉哀比葬三臨其喪發卒
穿冢給大路龍旂陳軍至墓謚曰武尋追封魏國公配食
文帝廟庭子曜居長以次子暉尚文帝女義安長公主故
遂以為嗣暉初賜爵義城郡公嘗卧疾青年文帝憂之賜
錢一十萬供其藥石之費魏恭帝二年加驃騎大將軍開
府儀同三司出為岐州刺史從文帝西巡率公卿子弟別
為一軍後襲趙國公改襲魏國公天和六年進位柱國建
德元年出為梁州摠管時渠逢二州生獠積年侵暴至州
綏撫並來歸附重書勞之暉弟衍字按豆少專武藝慨慷
有志略仕周為義州刺史封真鄉公王謙作亂以行軍摠

管從梁虜擊平之進上大將軍隋開皇元年以行軍摠管
討平叛蠻進位柱國後拜安州摠管以疾還京卒子仲威
嗣衍弟綸最知名有文武才用以功臣子少居顯職位至
司會中大夫開府儀同三司封河陽郡公為聘齊使主卒
子長雅嗣尚隋文帝女襄國公主位內史侍郎河州刺史
檢校秦州摠管綸弟晏開府儀同三司趙郡公從平飛虻
并州子憬以晏死王事即襲其官爵曜既不得嗣朝廷以
弼功重封曜邢國公位開府子寬幹略過人自周及隋數
經將領位柱國蒲山郡公號為名將弼弟擢字雲傑長不
盈五尺性果決有膽氣魏永安元年以兼別將從余朱榮

破元顥榮誅隋尔朱兆入洛及魏孝武西遷搦從都督元
弼之與齊神武戰敗遂與弼之奔梁後得逃歸進封晉陽
縣子尋為周文帝帳內都督從復弘農破沙苑搦時跨馬
運矛衝堅陷陣隱身軍中敵入見之皆避此小兒不
知搦之形貌正自如此周文初亦聞搦驍悍未見其能至
是方嗟歎之謂曰但問膽決如何何必要須八尺之軀也
以功進爵為公武成初從豆盧寧征稽胡進爵汝南郡公
出為摠管延綏丹三州諸軍事延州刺史卒官無子以弼
子椿嗣位開府儀同大將軍右宮伯改封河東郡公
密字法上蒲山公寬之子也才兼文武志氣雄遠少龍爵

蒲山公養客禮賢無所愛吝與揚玄感為刎頸交後更折
節耽學尤好兵書誦皆在口師重國子助教包愷受史記
漢書愷門徒皆出其下大業初授親衛大都督以疾歸及
玄感有逆謀召密令與弟玄挺赴黎陽以為謀主密進三
計曰今天子遠在遼外公長驅入薊直扼其喉前有高麗
退無歸路不戰而禽此計上也又關中四塞衛文昇不足
為意今率眾務早入西萬全之勢此計中也若隨近先向
東都以引歲月此計之下也玄感曰公下計乃上策矣今
百官家口並在東都若不取之安能動物且經城不投何
以示威密計不行玄感既至東都自謂功在朝文及獲事

福嗣既非同謀設誓皆持兩端玄感後使作檄文固辭不肯密揣知其情請斬之玄感不從密退謂所親曰楚公好反而不欲勝吾屬公為實矣後玄感將西入福嗣竟亡歸東都時李雄勸玄感速稱尊號玄感以問密密以為不可玄感笑而止及宇文述來護等軍且至玄感謂密計將安出密曰元弘嗣統強兵於隴右今可揚言其反遣使迎公因此入關可得給衆玄感遂用密謀號令西至陝縣圍弘農不拔西至閩鄉追兵至玄感敗密間行入關與玄感從叔詢相隨匿馮翊詢妻家尋為隣人告被捕與其黨俱送帝所在途與其衆謀逃其徒多金密令出示使者曰吾等

死日此人留付公幸用相壅其餘即皆報德使者利金遂相許及出關密每夜宴飲行次邯鄲夜宿村中密等七人皆穿墻而遁與王仲伯亡抵平原賊帥郝孝德孝德不甚禮之備遭饑饉削樹皮而食之仲伯潛歸天水密詣淮陽舍於村中變姓名稱劉智遠聚徒教授經數月鬱鬱不得志為五言詩詩成泣下數行時人有恠之以告太守趙他下縣捕之密亡抵其妹夫雍丘令丘君明君明從子懷義後告之密得遁去君明竟坐死密投東郡賊帥翟讓乃因王伯當以策干讓遣說諸小賊於至輒降讓始敬焉召與計事密以兵衆無糧勸讓直趣滎陽休兵館穀然後爭利

讓從之乃掠下滎陽太守郇王慶及通守張須陁以兵討讓讓數為須陁敗將遠避之密勸讓列陣以待密以奇兵掩擊大破之斬須陁於陣讓於是令密建牙別統所部復說讓以鄆清天下為事令掩據興洛倉發粟以振窮乏於是與讓以義寧元年春出陽城北踰方山自羅口襲興洛倉破之開倉振百姓越王侗遣武賁郎將劉長恭討密密城洛口周回四十里以居之讓上密號為魏公設壇場即位稱元年以房彥藻為左長史郇元真為右長史楊德方為左司馬鄭德韜為右司馬拜讓為司徒封東郡公長白山賊孟讓掠東郡燒豐都市而歸密攻下鞏縣獲縣長柴孝和拜為護軍武賁郎將裴仁基以武牢歸密密因遣仁基與孟讓襲破回洛倉據之俄而德韜德方俱死復以鄭頴為左司馬鄭虔象為右司馬柴孝和說密令裴仁基守回洛翟讓據洛口身率精銳西襲長安不然他人我先密曰此誠上策然我之所部並山東人既見未下洛陽恐不肯西入孝和請行間觀隙乃與數十騎至陝縣賊歸之者萬餘人密時兵鋒甚銳每入苑與官軍連戰會密為流矢所中卧於營內東都出兵擊之密眾大潰棄回洛倉歸洛口孝和之眾聞密敗各分散而去孝和輕騎歸密煬帝遣王世充率江淮勁卒五萬討密敗之孝和溺洛水死密甚

傷之世充營於洛西與密相拒百餘日武陽郡丞元寶藏
黎陽賊帥李文相洹水賊帥張昇清河賊帥趙君德平原
賊帥郝孝德並歸密共襲破黎陽倉據之周法明舉江黃
之地以附密齊郡賊帥徐圓朗任城大俠徐師仁淮陽太
守趙他等前後款附以千百數翟讓所部王儒信勸讓為
太宰摠衆多以奪密權兄寬復謂讓曰天子止可自作安
得與人汝若不作我當為之密聞惡之會讓拒世充軍退
數百步密與單雄信等赴之世充敗走讓欲乘勝破其營
會日暮固止之明日讓與數百人至密所欲為宴樂其所
將左右各就良諸門並設備讓不覺密引讓入坐令讓射

引滿將發密遣壯士蔡建自後斬之遂殺其兄寬及儒信
等從者亦有死焉讓部將徐世勳為亂兵所斫中重創密
止之僅得免雄信等皆叩頭求哀密並釋而慰之於是諸
讓營遣王伯當邢元真單雄信等告以殺讓意令世勳雄
信伯當分統其衆世充夜襲倉城密拒破之斬武賁郎將
費青奴世充復營洛北於洛水構浮橋衆擊密密拒之
不利而退世充因薄其城下密擊之大潰爭橋橋陷滿水
者數萬人武賁郎將楊威王辨霍世舉劉長恭梁德重童
智通等皆沒于陣世充僅而獲免不敢還東都遂走河陽
其夜大雪餘衆死亡殆盡密乃修金墉故城居之衆三十

餘萬攻上春門留守章津出戰被執其黨勸密即尊號密
不許及義士圍東都密出軍爭之交綏而退俄而宇文化
及弒逆自江都北指黎陽密拒之會越王侗稱尊號遣使
接密太尉尚書今東南道大行臺行軍元帥魏國公令先
平化及然後入朝輔政化及至黎陽徐世勣守倉城不下
密共化及隔水語密數之曰卿本匈奴卑隸破野頭耳又
與兄弟首受隋恩豈容躬行殺虐今若速來歸義尚可全
後嗣化及默然俯仰良久乃瞋目大言曰共你論相殺事
何須作書傳雜語密謂從者曰化及庸懦如此忽欲圖帝
王吾當拚杖驅之知其糧且盡因偽與之和化及大喜恣

其兵食異密饋之會密下有人獲罪亡投之具言密情化
及大怒又食盡廼與密戰于童山下自辰達酉密中流矢
頓於汲縣化及掠汲郡北趨魏縣以輜重留於東郡遣其
刑部尚書王軌守之軌以郡降密以軌為滑州總管密引
兵而西遣記室參軍李儉朝于東都執弒帝人于弘達以
獻越王侗侗以儉為司農少卿使召密入朝密至温縣聞
世充已殺元文都盧楚等乃歸金墉城世充既擅權乃厚
賜將士時密兵少衣世充之食乃請交易邴元真等各求
私利遂勸密密許焉初東都絕糧人歸密者日有數百至
此得食降人益少密悔而止密雖據倉無府庫兵數戰不

賞又厚撫初附兵於是衆心漸怨時邴元真守洛口倉性貪鄙宇文溫每謂密曰不殺元真公難未已密不答而元真知之謀叛揚慶聞而告密密因疑焉會世充悉衆來戰密留王伯當守金墉自就偃師北阻芒山以待之世充令數百騎度御河密遣裴行儼等逆之會日暮行儼孫長樂程甌金等驍將十數人皆重創密甚惡之世充夜潛濟詰朝而陣密方覺之狼狽出戰敗績馳向洛口世充夜圍偃師守將鄭頌爲其部下翻城而降世充密將入洛口倉城元真已遣人引世充密陰知之不發其事欲待世充兵半度洛水然後擊之密候騎不時覺比將出戰世充軍悉已濟密引騎而遁元真以城降世充密衆漸離將如黎陽人或曰救翟讓之際徐世勣幾死其心安可保密乃止時王伯當棄金墉城保河陽密自武牢濟歸之謂曰久苦諸君我今日自刎以謝衆衆皆泣莫能仰視密復曰諸君幸不相棄當共歸關中密身雖愧無功諸君必保富貴其府掾柳燮曰明公與長安宗族有疇昔之遇雖不陪起義然阻東都斷隋歸路使唐國不戰而得京師此公之功也衆咸曰然密遂歸朝封邢國公拜光祿卿尋奉使出關安撫至熊州而逃叛見殺

宇文貴字來貴其先昌黎大棘人也徙居夏州父莫豆干

保定中以貴勲追贈柱國大將軍少傅夏州刺史安平郡
公貴母初孕貴夢老人抱一子授之曰賜爾是子俾壽且
貴及生形類所夢故以永貴字之貴少從師受學嘗輟書
歎曰男兒當提劍汗馬以取公侯何能爲博士也魏正光
末破六韓拔陵圍夏州刺史源子邕嬰城固守以貴爲統
軍後從介朱榮禽葛榮於滏口加別將又從元天穆平邢
景轉都督元顥入洛貴率鄉兵從介朱榮有功封革融縣
侯除郢州刺史入爲武衛將軍關內大都督從魏孝武西
遷進爵化政郡公貴善騎射有將帥才周文帝又以宗室
甚親委之大統初與獨孤信入洛陽東魏潁州長史賀若
統據潁川來降東魏遣將堯雄趙育是石寶率衆二萬攻
潁川貴自洛陽率步騎二千救之軍次陽翟雄等去潁川
四十里東魏行臺任祥又率衆四萬將與雄合諸將咸以
彼衆我寡不可爭鋒貴曰若賀若一陷吾輩坐此何爲遂
入潁川雄等稍進貴率千人背城爲陣與雄合戰貴馬中
流矢乃短兵步鬪雄大敗輕走趙育於是降任祥聞雄敗
遂不敢進貴乘勝逼祥敗之是石寶亦降師還魏文帝在
天游園以金卮置侯上令公卿射中者即賜之貴一發而
中帝笑曰由基之妙正當爾耳進侍中驃騎大將軍開府
儀同三司十六年遷中外府左長史進位大將軍官昌王

梁彌定爲宗人獠甘所逐來奔又有羌酋傍乞鐵忽因梁
介定反後據有渠株川擁隸數千家與渭州人鄭五醜同
反周文令貴與巨盧寧討之貴等禽斬鐵忽及五醜寧文
別擊獠甘破之乃納彌定并於渠株川置岷州朝廷重功
遂於粟坂立碑以紀其績廢帝三年詔貴代尉遲迥鎮蜀
時隆州人開府李光易反於鹽亭攻圍隆州而隆州人李
拓亦聚衆反開府張道應之貴乃命開府叱奴與牧隆州
又令開府成亞擊拓及道降之竝送京師除益州刺史未
就拜小司徒先是蜀人多劫盜貴乃召任夾傑健者署爲
將軍二十四部令其各捕由是頗息周穆帝踐阼進位

柱國拜御正中大夫武成初與首蘭祥討吐谷渾軍還建
封許國公邑萬戶舊爵回封一子遷大司空行小冢宰遷
大司徒遷太保貴好音樂耽亦其初留連不倦然好施愛士
時人頗以此稱之保定末使突厥迎皇后天和二年還至
張掖薨贈太傅謚曰穆子善嗣善弘厚有武藝大象末位
上柱國封許國公隋文帝受禪遇之甚厚拜其子穎上儀
同及善弟愷誅竝廢于家善未幾卒穎大業中位司農少
卿後沒李密善弟忻

忻字仲樂幼而敏慧爲童兒時與群輩戲輒爲部伍進止
行列無不用命者年十二能左右馳射驍捷若飛恒謂所

親曰自古名將唯以韓白衛霍為美談吾察其行事未足
多尚使與僕並時不令堅子獨擅高名年十八從周齊王
憲討突厥以功拜儀同三司賜爵興固縣公韋孝寬以忻
驍勇請與鎮玉壁以戰功加開府進爵化政郡公從武帝
攻拔晉州齊後主親擄兵六軍憚之欲旋忻諫曰以陛下
之聖武乘敵人之荒縱何往而不尅若齊人更得令主君
臣協力未易平也帝從之乃戰遂大尅及帝攻陷并州先
勝後敗帝為賊所窘挺身而遁諸將多勸帝還忻勃然曰
破城士卒輕敵微有不利何足為懷今破竹形已成柰何
棄之而去帝納其言明日復戰拔晉陽齊平進位大將軍

尋與烏丸軌破陳將吳明徹於吕梁進位柱國除豫州摠
管隋文帝龍潛時與忻情好甚協又為丞相恩顧彌隆尉
遲迥作亂以忻為行軍摠管隋韋孝寬擊之時兵屯河陽
帝令高頴馳驛監軍與頴密謀進取者唯忻而已迥遣子
惇盛共武陟忻擊走之進臨相州迥遣精甲三千伏野馬
岡忻以五百騎襲之斬獲略盡進至草橋迥又拒守忻以
奇兵破之直趨鄴下迥背城結陣大戰官軍不利時鄴城
士庶觀戰者數萬人忻謂左右曰事急矢吾當以權道破
之於是射觀者走之轉相騰籍聲如雷霆忻乃傳呼曰賊
敗矣衆復振齊力急擊之迥軍大敗及平鄴以功遷上柱

國文帝謂曰尉遲迥傾山東之衆連百萬之師公舉無遺
筭策無全障誠天下英傑也進封英國公自是每參帷幄
出入卧内禪代之際忻有力焉後拜左領軍大將軍寵顧
彌重忻解兵法馭戎齊整當時六軍有一善事雖非忻建
在下輒相謂曰此必英公法也其見推服如此後改封杞
國公上嘗欲令忻擊突厥高頴曰忻有異志不可委以大
兵乃止忻既佐命功臣頴經將領甚有威名上由是微忌
之以譴去官與梁士彥昵狎數相往來士彥時亦然望雲
園不軌忻謂士彥曰帝王豈有常乎相扶即是公於蒲州
起事我必從征兩陣相當然後連結天下可圖也謀泄伏

誅家口籍沒忻弟愷愷字安樂在周以功臣子年三歲賜
爵雙泉伯七歲進封安平公愷多有器局諸兄並以弓馬
自達愷獨好學博覽書記解文多伎藝各公子累遷御
正中大夫儀同三司隋文帝爲丞相加上開府近師中大
夫及踐阼誅宇文氏愷亦將見殺以與周本別又兄忻有
功故見赦後拜營宗廟副監太子左庶子廟成別封醜山
縣公及遷都上以愷有巧思詔領營新都副監高頴雖摠
大綱凡所規畫皆出於愷及決渭水達河以通運漕詔愷
摠督其事後拜萊州刺史甚有能名坐兄忻誅除名於家
久不得調會朝廷以魯班故道久絕不行令愷脩之既而

上建仁壽宮右僕射楊素言愷有巧思於是檢校將作大匠歲餘拜仁壽宮監授儀同三司尋為將作少監文獻皇后崩愷與楊素營山陵上善之復爵安平郡公煬帝即位遷都洛陽以愷為營東都副監尋遷將作大匠愷揣帝心在宏侈於是東都制度窮極壯麗帝大悅進位開府拜工部尚書及長城之役詔愷規度之時帝北巡欲誇戎狄令愷為大帳其下坐數千人帝大悅賜物千段又造觀風行殿上容衛者數百人離合為之下施輪軸推移倏忽有若神功戎狄見之莫不驚駭帝彌悅前後賞賜不可勝紀是時將復古制明堂議者皆不能決愷博考群籍為明堂圖樣奏之又以張衡渾象用三分為一度裴秀輿地以一寸為千里臣之此圖以一分為一尺推而演之又引于時議者或以綺井為重屋或以圓楣為殿棟將為臆說事不經見今錄其疑難為之通釋皆出證據以相發明為議曰臣愷謹按淮南子曰昔者神農之御天下也甘雨以時五穀蕃植春生夏長秋收冬藏月省時考終歲獻貢以時嘗穀祀于明堂明堂之制有蓋而無四方風雨不能龍卷燥濕不能傷遷延而入之臣愷以為上古朴略初立典刑尚書帝命驗曰帝者承天立五府以尊天重象赤曰文祖黃曰神斗白曰顯紀黑曰玄矩蒼曰靈府注云唐虞之天府夏之

世室殷之重屋周之明堂皆同矣尸子曰有虞氏曰總章
周官考工記曰夏后氏世室堂脩二七博四脩一注云脩
南北之深也夏度以步合堂脩十四步其博益以四分脩
之一則堂博十七步半也臣愷案三王之世夏最爲古從
質尚文理應漸就寬大何因夏室乃大殷堂相形爲論理
恐不爾記云堂脩二七博四脩一若夏度以步則應脩七
步注云今堂脩十四步乃是增益記文殷周二堂獨無加
字便是義類例不同山東禮本輒加二七之字何得殷無
加尋之文周闕增筵之文我研窮其趣或是不然讎校古書
竝無二字此乃桑間俗儒信情加減黃圖議云夏后氏益

其堂之大百四十四尺周人明堂以爲兩行間馬宮之言
止論堂之一面據此爲準則三代堂基竝方得爲上圓之
制諸書所說竝爲下方鄭注周官獨爲此義非直與古違
異亦乃乖背禮文尋文求理深恐未愜尸子曰殷人陽館
考工記曰殷人重屋堂脩七尋堂崇三尺四阿重屋注云
其脩七尋五丈六尺放周夏則其博九尋七丈二尺又曰
周人明堂度九尺之筵東西九筵南北七筵堂崇一筵五
室凡室二筵禮記明堂位曰天子之廟複廟重檐鄭注云
複廟重屋也注玉藻云天子廟及路寢皆如明堂制禮圖
云於內室之上起通天之觀觀八十一尺得宮之數其聲

濁君之象也大戴禮曰明堂者古有之凡九室室有四戶
 八牖以茅蓋上圓下方外水曰壁雍赤綴戶白綴牖堂高
 三尺東西九仞南北七筵其宮方三百步凡人疾六畜疫
 五穀災生於天道不順天道不順生於明堂不飾故有天
 災則飾明堂周書曰明堂方百一十二尺高四尺階博六
 尺三寸室居內方百尺室內方六十尺高八尺博四尺作
 洛曰明堂太廟路寢咸有四阿重亢重廊孔氏注云重亢
 累棟重廊累屋禮圖曰秦明堂九室十二階各有所居呂
 氏春秋曰有十二堂與月令同竝不論尺丈臣愷案十二
 階雖不與禮合一月一階非無理思黃圖曰堂方百四十

四尺坤之築也方象地屋圓楯徑二百一十六尺乾之築
 也圓象天室九宮法九州太室方六丈法陰之變數十二
 堂法十二月三十六法極陰之變數七十二牖法五行
 所得日數八達象八風法八卦通天臺徑九尺法乾以九
 覆六高八十一丈法黃鍾九九之數二十八柱象二十八
 宿堂高三尺王階三等法三統堂四向五色法四時五行
 殿門去殿七十二步法五行所行門堂長四丈取太室三
 之二垣高無蔽目之照牖六尺其外倍之殿垣方在水內
 法地陰也水四周於外象四海圓法陽也水闊二十四丈
 應二十四氣水內徑三丈應觀禮經武帝元封二年立明

堂汶上無室其外略依此制泰山通義今亡不可得而辨也元始四年八月起明堂壁雍長安城南門制度如儀一殿垣四面門八觀水外周堤壤高四方和會築作三旬五年正月六日辛未始郊太祖高皇帝以配天二十一日丁亥宗祀孝文皇帝於明堂以配上帝及先賢百辟卿士有益者於是秩而祭之親扶三老五更袒而割牲跪而進之因班時令宣恩澤諸侯宗室四夷君長匈奴西國侍子悉奉貢助祭禮圖曰建武三十年作明堂堂上圓下方圓法天方法地十二堂法曰辰九室法九州八憲象八風八九七十二法一時之王室有二戶二九十八戶法土五十八

日內堂正壇高二尺土階三等胡伯始注漢官云古清廟蓋以茅今蓋以瓦瓦下藉茅以存古制東京賦曰乃營三宮布政頌嘗復廟重屋八達九房造舟清池惟水泱泱薛綜注云複重廟覆謂屋平覆重棟也續漢書祭祀志曰明帝永平二年祀五帝於明堂五帝坐各處其方黃帝在未皆如兩郊之位光武位在青帝之南少退西南各一犢奏樂如南郊臣愷案詩云我將祀文王於明堂也我將我享維羊維牛據此則備大牢之祭今云一犢恐與古殊自晉以前未有鷓尾其祀墻壁水一依本圖晉起居注裴頡議曰尊祖配天其義明著廟宇之制理據未分直可爲一殿

以崇嚴祀其餘雜碎一皆除之臣謹案天垂象聖人則之
辟雍之星既有圖狀晉室方構不合天文既闕重樓又無
璧水空堂乖五室之義直殿違九階之文非古欺天一何
過甚後魏於北臺城南造圓墻在璧水外門在水內廻立
不與墻相連其堂上九室三三相重不依古制室間通巷
違舛處多其室皆用擊累極成褊陋後魏樂志曰孝昌二
年立明堂議者或言九室或言五室詔斷從五室後元又
執政復改爲九室遭亂不成宋起居注曰孝武大明五年
立明堂其墻宇規範擬則太廟唯十二間以應青數依漢
阪上圖儀設五帝位太祖文皇帝對饗鼎俎簠簋一依

禮梁武即位之後移宋時太極殿以爲明堂無室十二間
禮疑議云祭用純漆俎五樽文於郊質於廟止一獻用清
酒平陳之後臣得目觀遂量步數記其尺丈猶見焚燒殘
柱毀破之餘入地一丈燬然如舊柱下以樟木爲跗長丈
餘闊四尺許兩兩相竝凡安數重宮城處所乃在郭內雖
湫隘卑陋未合規摹但祖宗之靈得崇嚴祀周齊二代闕
而不脩大饗之典於焉靡託自古明堂圖唯有二本一是
宗周劉熙阮謨劉昌宗等作三圖略同一是後漢建武三
十年作禮圖有本不詳撰人臣遠尋經傳傍求子史研究
衆說摠撰今圖其樣以木爲之下爲方堂堂有五室上爲

圓觀觀有四門帝可其妻會遼東之役事不果行以度遼之功進位金紫光祿大夫其年卒官帝甚惜之謚曰康撰東都圖記二十卷明堂圖議三卷釋疑一卷見行於世長子儒童游騎尉少子温起部承務郎

侯莫陳崇字尚樂代武川人也其先魏之別部居庫斛真水祖元以良家子鎮武川代因家焉父興殿中將軍羽林監後以崇著勲追贈柱國太保清河郡公崇少驍勇善馳射謹慤少言年十五隨賀拔岳與尔朱榮征葛榮後從岳入關破赤水蜀又從岳力戰破万俟醜奴崇與輕騎逐北至涇州長坑及之賊未成列崇單騎入賊中於馬上生禽

醜奴遂大破之封臨涇縣侯及岳為侯莫陳悅所害崇與諸將同謀迎周文帝文帝至軍原州刺史史歸猶為悅守周文遣崇襲歸直到城下即據城門時李遠兄弟在城內先知崇來中外鼓譟伏兵悉起遂禽歸斬之以崇行原州事仍從平悅別封廣武縣伯累遷儀同三司改封彭城郡公從禽竇泰復弘農破沙苑戰河橋又別討平稽胡累戰皆有功進位柱國大將軍六官建拜大司空周孝閔踐阼進封梁國公加太保歷太宗伯大司徒保定三年從武帝幸原州時帝夜還京師竊怪其故崇謂所親人常昇曰吾比日聞卜筮者晉公今年不利車駕今忽夜還不過是晉

公死耳於是皆傳之或有發其墓者帝集諸公卿於大德殿責崇崇惶懼謝罪其夜護遣使將兵就崇宅逼令自殺葬禮如常儀謚曰躁護誅改謚曰莊閔子芮嗣位柱國從武帝東伐率衆守太行道并州平授上柱國仍從平鄴拜大司馬隋文大業初以謫詔流配嶺南芮弟穎

穎字遵道少有器重風神警發為時輩所推魏大統末以父軍功賜爵廣平侯累遷開府儀同三司周武帝時從滕王道擊龍泉文城叛胡穎與柱國豆盧勳分路而進穎懸軍五百餘里破其三柵先是稽胡叛亂輒略邊人為奴婢至是詔胡有馱匿良人者誅籍沒其妻子有人言為胡村

所隱匿者勳將誅之穎曰將在外君令有所不行諸胡固非悉反但相迫脅為亂今慰撫自可不戰而定如即誅之轉相驚恐為難不細未若召其渠帥以隱匿者付之令自歸首則群胡可安勳從之諸胡爭降附北土以安遷司武加振威中大夫隋文帝受禪加上開府進爵昇平郡公平陳之役以行軍總管從秦王俊出魯山道與行軍總管段文振度江安集歸附再遷瀛州刺史甚有惠政後坐與秦王俊交通免官百姓送者莫不流涕因相與立碑頌穎清德後拜邢州刺史仁壽中吏部尚書牛弘持節巡撫山東以穎為第一上優詔褒揚時朝廷以嶺南刺史縣令多貪

鄙蠻夷然叛妙簡清吏於是徵頴入朝上與言及平生以
為歡笑即日進位大將軍拜桂州摠管十七州諸軍事及
至官大崇恩信人夷悅服煬帝即位頴兄梁國公芮坐事
徙邊朝廷恐頴不自安徵還京師後拜恒山太守其年嶺
南閩越多不附帝以頴前在桂州有惠政為南方所信伏
拜南海太守卒官謚曰定子慶會最知名

崇兄順少豪俠有志度初事尔朱榮為統軍普泰元年封
木縣子後從魏孝武入關順與周文帝同里開素相友善
且崇先在關中周文見之甚歡進爵彭城郡公及入關定
圍逼河州以順為大都督與趙貴討破之即行河州事大

統四年魏文帝東討順與太尉王盟僕射周惠達等留鎮
長安時趙青雀反盟及惠達奉魏太子出次渭北順於渭
橋與賊戰頻破之魏文帝還執順手曰渭橋之戰卿有殊
力便解所服金鏤玉梁帶賜之南岐州氏姜符安壽遂率
部落一千家款附時順弟崇又封彭城郡公遂改封順河
間郡公六年加驃騎大將軍開府儀同三司行西夏州事
改封平原郡公周孝閔帝踐阼拜少師進位柱國其年薨
崇弟瓊歷位荊州摠管上柱國封脩武郡公瓊弟凱以軍
功賜爵下蔡縣男崇以平原州功賜爵靈武縣侯詔聽
轉授凱孝閔踐阼進位開府儀同三司進爵為公天和中

為司會中大夫建德二年為聘齊使主

王雄字雄胡布頭太原人也父嶠以雄著勲追贈柱國大將軍少傅安康郡公雄儀貌魁梧少有謀略魏末從賀拔岳入關除金紫光祿大夫孝武西遷封臨貞縣伯大統中進爵武威郡公累遷大將軍行同州事恭帝元年賜姓可頻氏周孝閔帝踐阼授少傅進位柱國大將軍武成初進封庸國公邑萬戶出為涇州撫管保定四年從晉公護東征至甚山與齊將斛律明月戰退走左右皆散矢又盡唯餘一奴一矢在焉雄案稍不及明月者文餘曰惜爾不得殺但生將爾見天子明月反射雄中額抱馬走至營薨贈

使持節太保同華等二十州諸軍事同州刺史謚曰忠子

謙

謙字敦萬性恭謹無他才能以父功封安樂縣伯保定二年父雄封庸國公以武威郡公回封謙安樂伯回封第三弟震雄死朝議以謙父殞行陣特加殊寵授柱國大將軍襲爵庸國公建德五年武帝東征謙力戰進位上柱國六年授益州摠管十八州諸軍事及宣帝崩隋文帝輔政以梁睿為益州摠管時謙使司錄賀若昂奉表詣闕昂還具陳京師事謙以父子受國恩將圖匡復遂舉兵署置官司摠管長史乙弗虔益州刺史達奚善觀謙馮險觀變隆州

刺史高阿那肱爲謙畫三策曰公親率精銳直指散關蜀人知公有勤王之節必當各思効命此上策也出兵梁漢以顧天下此中策也坐守劔南發兵自衛此下策也謙參用其中下之策梁虜未至大劔謙先遣兵鎮始州隋文帝即以睿爲行軍元帥便發利鳳文秦成諸州兵討之謙所署柱國達奚其高阿那肱大將軍之弟虜楊安任峻侯翕景孛等衆號十萬盡銳攻利州掇管楚國公豆盧勳拒戰將四旬其等諸軍聞睿將至衆遂潰謙所署大將軍符子英攻巴州又爲刺史呂玘所破睿乘其弊縱兵深入其虜密遣使詣睿請爲內應以贖罪謙不知其虜之反已也

竝令守成都謙先無籌略且所任用多非其才及聞睿兵奄至惶懼計無所出乃自率衆逆戰又以其虜之子爲左右軍行數十里左右軍皆叛謙奔新都縣令王寶執而斬之傳首京師其虜以成都降虜文帝以其虜首謀令殺之於蜀市餘衆竝散阿那肱尋亦被誅

論曰李弼懷佐時之略逢興運之期締構艱難綢繆顧遇方面宣其庸績帷幄盡其謀猷非唯攀附成名抑亦材謀自取密遭風雲之會奮其鱗翼思封函谷將割鴻溝暮月之間衆數十萬威行萬里聲動四方雖事屈興王運飛天眷而雄名克振何其壯歟然志性輕狡終致僨覆固其宜

也字文貴負將帥之材蘊剛銳之氣遭逢喪亂險阻備嘗
自致高位亦云美矣所武藝之風名高一代及晚節遇禍
雖鳥盡弓藏然亦器盈斯槩夷戮非為不幸愷學藝兼該
思理通贍規矩之妙參蹤班爾當時制度咸取則焉其起
仁壽宮營建洛邑要求時幸窮侈極麗使文皇失德煬帝
亡身危亂之原抑亦由此至於考覽書傳定明堂圖雖意
過其通有足觀者侯莫陳崇以勇悍之氣逢戰爭之秋輕
騎登高平之扉逆馬得長坑之俊以宏材遠略附鳳攀龍
茂績元勳位居上衮而識慙明哲遂以凶終惜哉王雄身
參佐命謙寵列山河及投袂勤王志匡社稷雖愚君之効

未宣與夫懷祿圖存者異也初魏孝莊帝以朱榮有翊
戴之功拜榮柱國大將軍位在丞相上榮敗後此官遂廢
大統三年魏文帝復以周文帝建中興之業始命為之其
後功參佐命望實俱重者亦居此職自大統十六年已前
任者凡有八人周帝位摠百揆都督中外軍事魏廣陵王
欣元氏懿戚從容禁闥而已此外六人各督二大將軍分
掌禁旅當爪牙禦侮之寄當時榮盛莫與為比故今之稱
門閥者咸推八柱國家今并十二大將軍錄之於左使持
節太尉柱國大將軍大都督尚書左僕射隴右行臺少師
隴西郡開國公李諱使持節太傅柱國大將軍大宗師大

司徒廣陵王元欣使持節柱國大將軍大都督大宗伯趙
郡開國公李弼使持節柱國大將軍大都督大司馬河內
郡開國公獨孤信使持節柱國大將軍大都督大司寇南
陽郡開國公趙貴使持節柱國大將軍大都督大司空常
山郡開國公于謹使持節柱國大將軍大都督少傅彭城
郡開國公侯莫陳崇與周文帝爲八柱國使持節大將軍
大都督少保廣平王元贊使持節大將軍大都督淮安王
元育使持節大將軍大都督齊王元廓使持節大將軍大
都督平原郡開國公侯莫陳順使持節大將軍大都督七
州諸軍事秦州刺史章武郡開國公宇文遵使持節大將
軍大都督雍州諸軍事雍州刺史高陽郡開國公達奚武
使持節大將軍大都督陽平郡開國公李遠使持節大將
軍大都督范陽郡開國公豆盧瑩使持節大將軍大都督
化政郡開國公宇文貴使持節大將軍大都督荊州諸軍
事荊州刺史博陵郡開國公賀蘭祥使持節大將軍大都
督陳留郡開國公楊忠使持節大將軍大都督岐州諸軍
事岐州刺史武威郡開國公王雄是爲十二大將軍每大
將軍督二開府凡爲二十四員分團統領是二十四軍每
一團儀同二人自相督率不編戶貫都十二大將軍十五
日上則門欄陞戟警晝巡夜十五日下則教旗習戰無他

賦役每兵唯辦弓刀一具月簡閱之甲槩戈弩並資官給
自大統十六年以前十二大將軍外念賢及王思政亦拜
大將軍然賢作牧隴右思政出鎮河南並不在領兵之限
此後功臣位至柱國及大將軍者衆矣不限此秩無所統
御六柱國十二大將軍之後有以位次嗣掌其事者而德
均素在諸公之下並不得預於此例

列傳第四十八

北史六十七

列傳第四十九

北史六十一

王盟

子勳

獨孤信

子羅

竇熾

子榮定兄子毅

加貝蘭祥

叱列伏龜

閻慶

子毗

史寧

子雄祥

權景宣

王盟字仲明德皇右之兄也其先樂浪人六世祖波前燕

太宰祖珽魏黃門侍郎贈并州刺史樂浪公父罷伏波將軍以良家子鎮武川因家焉魏正光中破六韓拔陵攻陷諸鎮盟亦為其所擁拔陵平後流寓中山復以積射將軍從蕭寶寅西征寶寅僭逆盟遂逃匿人間及爾朱天光入關盟從之隨賀拔岳禽万俟醜奴平秦隴常先登力戰及周文帝平侯莫陳悅除盟原州刺史孝武至長安封魏昌縣公大統二年徵拜司空轉司徒迎文帝悼后於蠕蠕加侍中遷太尉魏文帝東征以留後大都督行雍州事節度關中諸軍趙青雀之亂盟與開府李諱輔太子出頓渭北事平進長樂郡公賜姓拓跋氏遷太保九年進位太傅加

開府儀同三司盟姿度弘雅仁而汎愛雖居師傳禮冠群后而謙恭自處未嘗以勢位驕人魏文帝甚尊重之及疾數幸其第親問所欲十一年薨贈本官謚曰孝定子勣字醜興性忠果有材幹年十七從周文帝入關及平秦隴定關中周文嘗謂曰為將坐見成敗者上也被堅執銳者次也勣曰意欲兼被之周文大笑尋拜散騎常侍賜爵梁甫縣公大統初為千牛備身直長領左右出入卧内小心謹厚魏文帝常曰王勣可謂不二心臣也沙苑之役勣以都督領禁兵居左翼當其前者死傷甚衆勣亦被傷重遂卒於行間周文深悼焉贈使持節太尉

尚書令十州諸軍事雍州刺史追封咸陽郡公謚曰忠武
子弼襲爵尚魏安樂公主位大都督通直散騎常侍勳
弟懋字小興盟之西征也以懋尚幼留在山東永安中始
入關與盟相見遂從征伐大統初賜爵安平縣子後進爵
爲公累遷右衛將軍于時疆場交兵未申喪紀服齊斬者
並墨纓從事及盟薨懋上表辭位乞終喪制魏文帝不許
累遷開府儀同三司侍中左衛將軍領軍將軍懋温和小
心敬慎宿衛宮禁十有餘年勤恪當官未嘗有過廢帝二
年除南岐州刺史賜爵安寧郡公後拜小司空卒於官子
悅嗣位大將軍同州刺史改封濟南郡公盟兄子顯幼而
敏悟沉靜少言初爲周文帳內都督累遷驃騎大將軍開
府儀同三司光祿卿鳳州刺史賜爵洛邑縣公進位大將
軍卒子誼

誼字宜君少有大志便弓馬博覽群言周閔帝時爲左中
侍上士時大冢宰宇文護執政帝拱默無所關預有朝士
於帝側微不恭誼勃然而進將擊之其人惶懼請罪乃止
自是朝臣無敢不肅遷御正大夫父艱毀瘁過禮廬於墓
側負土成墳武帝即位累遷內史大夫封楊國公從帝伐
齊至并州帝旣入城反爲齊人所敗左右多死誼率麾下
驍雄赴之齊平自相州刺史徵爲大內史汾州稽胡亂誼

擊之帝弟越王盛譙王儉雖為總管並受誼節度賊平封
子開國公帝臨崩謂皇太子曰王誼社稷臣宜處以機密
不須遠任皇太子即位是為宣帝憚誼剛正出為襄州總
管及隋文帝為丞相鄖州總管司馬消難舉兵反帝以誼
為行軍元帥討之未至而消難奔陳于時北至商洛南拒
江淮東西二千餘里巴蠻多叛共推渠帥蘭洛州為主洛
州自號河南王以附消難北連尉遲迥誼分兵討之旬月
皆平帝遣使勞問冠蓋不絕以第五女妻其子奉孝尋
拜大司徒誼自以與帝有舊亦歸心焉及隋受禪顧
遇彌厚帝親幸其第與之極歡太常卿蘇威議以為戶
口滋多人田不贖欲減功臣之地以給人誼奏曰百官者歷
世勲賢方蒙爵土一旦削之未見其可帝以為然竟寢威
議帝將幸岐州誼諫曰陛下初臨萬國人情未洽何用此
行上戲之曰吾昔與公位望齊等一朝屈節為臣或當耻
愧是行也振揚威武欲以服公心耳誼笑而退尋奉使突
厥帝嘉其補首進鄴國公未幾其子奉孝卒踰年誼上表
言公主少請除服御史大夫楊素劾誼曰臣聞喪服有五
親疎異節喪制有四降殺殊文王者之所常行故曰不易
之道也而儀同王奉孝既尚蘭陵公主以去年五月身喪
始經一周而詎便請除釋竊以雖曰王姬終成下嫁之禮

公則主之猶在移天之義况復三年之喪自上達下及冝
釋服在禮未詳然夫婦之則人倫攸始喪紀之制人道至
大苟不重之取笑君子故鑽燧改火責以居喪之速朝祥
暮歌譏以忘哀之早然詎雖不自彊爵位已重欲為無禮
其可得乎乃薄俗傷教為父則不慈輕禮易喪致婦於
無義若縱而不止恐傷風俗有詔不問然恩禮稍薄詎頗
怨望或告詎謀反帝令案其事主者奏詎有不遜之言實
無反狀帝賜酒而釋之時上柱國元諧亦頗失意詎數與
往來言論醜惡胡僧告之公卿奏詎大逆不道罪當死帝
見詎愴然曰朕與公舊同學其相憐愍將奈國法何於是

詔曰詎有周之世早預人倫朕共遊庠序遂相親好然性
懷儉薄巫覡盈門鬼言怪語稱神道聖朕受命之初深存
戒約口云改悔心實不悛乃說四天王神道詎應受命書
有詎讖天有詎星桃鹿二川岐州之下歲在辰巳興帝王
之業密令卜問伺殿省之災又說其身是明王聖主信用
左道所在誑誤自言相表當王不疑此而赦之將或為亂
禁暴除惡宜伏國刑帝復令大理正趙綽謂詎曰時命如
此將若之何乃賜死於家時年四十六

獨孤信靈人也本名如願魏初有四十六部其先伏留
屯者為部落大人與魏俱起祖俟尼和平中以良家子自

雲中鎮武川因家焉父庫者為領人酋長少雄豪有節義
北州咸敬服之信美容儀善騎射正光末與賀拔度等同
斬衛可環由是知名後為葛榮所獲信既少年自脩飾服
章軍中號為獨孤即及爾朱氏破葛榮以信為別將從征
韓婁信匹馬挑戰禽賊漁陽王表賜同後以破元顥黨賜
爵受德縣侯遷武衛將軍賀拔勝出鎮荊州乃表信為大
都督及勝弟岳為侯莫陳悅所害勝乃令信入關撫岳餘
衆屬周文帝已統岳兵與信鄉里少相交善相見甚歡因
令信入洛請事至雍州大使元毗又遣信還荊州尋徵入
朝魏孝武雅相委任及孝武西遷事起倉卒信單騎及之

於灑溝孝武嘆曰武衛遂能辭父母捐妻子從我世亂識

忠良豈空言哉進爵潁陽郡公時荊州雖陷東魏人心猶
戀本朝乃以信為衛大將軍都督三荊州諸軍事兼尚書
右僕射東南道行臺大都督荊州刺史以招懷之既至東
魏刺史辛纂出戰信縱兵擊纂大敗之都督楊忠等前驅
斬纂於是三荆遂定東魏又遣其將高敖曹侯景等奄至
信以衆寡不敵遂率麾下奔梁居三載梁武帝方許信還
北信父母既在山東梁武帝問信所往荅以事君無二梁
武帝之禮送甚厚大統三年至長安以虧損國威上書謝
罪魏文帝付尚書議之七兵尚書僕郡王玄等議以為既

經恩降請赦罪復職詔轉驃騎大將軍加侍中開府尋拜
領軍將軍仍從復弘農破沁苑改封河內郡公俘虜中有
信親屬始得父凶問乃發喪行服尋起為大都督與馮翊
王元季海入洛陽賴豫襄廣陳留之地竝款附四年東魏
將侯景等圍洛陽信據金墉城隨方拒守旬有餘日及周
文帝至灑東景等退走信與李遠為右軍戰不利東魏遂
有洛陽六年侯景寇荊州周文令信與李弼出武關景退
即以信為大使慰撫三荆尋除隴右十一州大都督秦州
刺史先是守宰闇弱政令乖方人有寃訟歷年不能斷決
及信在州事無擁滯示以禮教勸以耕桑數年之中公私

富強民流之願附者數萬家周文以其信善邊邇故賜名為
信七年岷州刺史赤水蕃王梁公定舉兵反詔信討之公
定尋為其部下所殺而公定子弼仍收其餘眾信乃勒兵
向萬年頓三交谷口賊併力拒守信因詭道趨稠松嶺賊
不虞信兵之至望風奔潰乘勝逐北徑至城下賊竝出降
加授太子太保芒山之戰大軍不利信與于謹帥散卒自
後擊之齊神武追騎驚擾諸軍因此得全及涼州刺史宇文
文仲和據州不受代周文令信率開府怡峯討之仲和嬰
城固守信夜令諸將以衝梯攻其東北信親率壯士襲其
西南達明克之禽仲和虜其六千戶送于長安拜大司馬

丁三年大軍南討時以蠕蠕爲寇令信移鎮河陽十四年
進位柱國大將軍錄前後功贈封聽回授諸子於是第二
子善封魏寧縣公第三子穆必要縣侯第四子藏義寧縣
侯邑各一千戶第五子順武成縣侯第六子陀建忠縣伯
邑各五百戶信在隴右歲久啓求還朝周文不許或有自
東魏來者又告其母以問信發喪行服信陳哀苦請終禮
制又不許於是追贈信父庫者司空公追封信母費連氏
常山郡君十六年遷尚書令六官建拜大司馬周孝閔帝
踐阼遷大宗伯進封衛國公邑萬戶趙貴誅後信以同謀
坐免居無幾晉公護又欲殺之以其名均素重不欲顯其

罪適逼令自盡於家時年五十五信美風度雅有奇謀大
略周文初啓霸業唯有關中之地以隴右形勝故委信鎮
之既爲百姓所懷聲震隣國東魏將侯景之南奔梁也魏
收爲檄梁文矯稱信據隴右不從宇文氏乃云無關西之
憂欲以委梁人也又信在秦州嘗因獵日暮馳馬入城其
帽微側詰旦而吏人有戴帽者咸慕信而側帽焉其爲隣
境及士庶所重如此子羅先在東魏乃以次子善爲嗣及
齊平羅至而善卒又以羅之嗣信長女周明敬后第四女
元貞后第七女隋文獻后周隋及皇家三代皆爲外戚自
古以來未之有也隋文帝踐極乃下詔褒贈信太師上柱

國十州諸軍事異州刺史封趙國公邑一萬戶謚曰景追
贈信父庫者使持節鄠太尉上柱國六州諸軍事定州刺史
封趙國公邑一萬戶謚曰恭信母費連氏贈太尉趙恭公
夫人

羅字羅仁父信隨魏孝武入關中羅遂為高氏所囚及信
為宇文護誅羅始見釋寓居中山孤貧無以自給齊將獨
孤永業以宗族故哀之為買田宅遺以資畜初信入關後
復娶二妻郭氏生子六人善穆藏順陀整崔氏生隋獻皇
后及齊文帝為定州總管獻皇后遣人求羅得之相
見悲不自勝侍御者皆泣於是後遺車馬財物未幾周武

帝以羅功臣子久淪異域徵拜楚安郡太守以疾去官歸
京師諸弟見羅少長貧賤每輕侮不以兄禮事之然性長
者亦不與諸弟校競長短后由是重之文帝為丞相拜羅
儀同常置左右既受禪詔追贈羅父其諸弟以羅母沒齊
先無夫人號不當承襲上以問后后曰羅誠嫡長不可誣
也於是襲爵趙國公以其弟善為河內郡公穆為金泉縣
公藏為武平縣公陀為武喜縣公整為千牛備身擢拜羅
為左領將軍遷左衛將軍前後賞賜不可勝計出為涼州
總管進位上柱國徵拜左武衛大將軍煬帝嗣位改封蜀
國公未幾卒官謚曰恭子纂嗣位河陽都尉纂弟武都大

業末亦為河陽都尉庶長子開遠字文化及之弒逆也裴
虔通率賊入城象殿宿衛兵士皆從逆開遠時為千牛與
獨孤盛力戰閣下為賊所執賊義而捨之

善字伏陀幼聰慧善騎射以父封勳封魏寧縣公魏廢帝
元年又以父勳授驃騎大將軍開府儀同三司加侍中進
爵長城郡公周孝閔帝踐阼除河州刺史以父負豐父廢
於家保定三年乃授龍州刺史天和六年襲爵河內郡公
從帝東討以功授上開府尋除兗州刺史政在簡惠百姓
安之卒於州贈使持節柱國五州諸軍事定州刺史子覽
嗣位右候衛大將軍大業末卒

陀字梨邪仕周晉附上士坐父徙蜀十餘年字文護誅如
歸長安隋文帝受禪拜上開府領左右將軍累轉延州刺
史陀性好左道其外祖母高氏先事猫鬼已殺其舅郭沙
羅因轉入其家上微聞而不信會獻皇后及楊素妻鄭氏
俱有疾召醫視之皆曰此猫鬼疾上以陀后之異母弟陀
妻楊素之異母妹由是意陀所為陰令其兄左監門郎將
穆以情喻之上又避左右諷陀言無有上不說左轉遷
州刺史出怨言上令左僕射高頴納言蘇威大理正皇甫
孝緒大理丞楊遠等雜案之陀婢徐阿尼言本從陀母家
來常事猫鬼每以子日夜祀之言子者鼠也其猫鬼每殺

人者所死家財物潛移於畜猫鬼家阤嘗從家中索酒其妻曰無錢可酤阤因謂阿尼曰可令猫鬼向越公家使我足錢阿尼便呪之居數日猫鬼向素家後上初從并州還阤於園中謂阿尼曰可令猫鬼向皇后所使多賜吾物阿尼復呪之遂入宮中楊遠乃於門下外省遣阿尼呼猫鬼阿尼於是夜中置香粥一盆以匙扣而呼曰猫文可來無佳宮中久之阿尼色正青若被牽拽者云猫鬼已至上以其事下公卿竒章公牛弘曰祇由人興殺其人可以絕矣上令犢車載阤夫妻將賜死於其家阤弟司勳侍中整詣闕求哀於是免阤死除各以其妻楊氏為尼先是有人訟其

母為人猫鬼所殺者上以為祇妄怒而遣之及此詔誅被訟行猫鬼家阤未幾而卒煬帝即位追念舅氏聽以禮葬乃下詔贈正議大夫帝意猶不已復贈銀青光祿大夫二子延福延壽阤弟整位幽州刺史大業初贈金紫光祿大夫平鄉侯

竇熾字光成扶風平陵人後漢大鴻臚章之後也章子統靈帝時為鴈門太守避竇武之難亡奔匈奴遂為部落大後魏南徙子孫因家代賜姓統居陵武累世仕魏皆至大官父略平遠將軍以熾著勲贈少保柱國大將軍建昌公熾性嚴明有謀略美鬚身身長八尺二寸少從范陽祈

忻受毛詩左氏春秋略通大義善騎射精力過人魏正光
末北鎮擾亂乃隨略避地定州投葛榮榮欲官略略不受
榮疑其有異志遂留略於冀州將熾及熾兄善隨軍及尔
朱榮破葛榮熾乃將家隨榮於并州時葛榮別帥韓婁等
據薊城不下以熾為都督從驃騎將軍侯深討之熾手斬
婁以功拜楊烈將軍魏孝武即位蠕蠕等諸蕃竝遣使朝
貢帝臨軒宴之有鷓飛鳴於殿前帝素知熾善射因欲矜
示遠人乃給熾御箭兩隻命射之鷓乃應弦而落諸蕃人
咸歎異焉帝大悅尋隨東南道行臺樊子鵠追尔朱仲遠
奔梁時梁主又遣元樹入寇據譙城子鵠令熾擊破之封

行唐縣子尋進爵上洛縣伯時帝與齊神武構隙以熾有
威重堪夙爪牙任拜閣內大都督遷朱交直閣遂從帝西
遷仍與其兄善至城下與武衛將軍高金龍戰於千秋門
敗之因入宮城取御馬四十四匹并鞍勒進之行所帝大悅
賜熾及善駿馬各二匹駑馬十匹大統元年別封真定縣
公從周文帝禽竇泰復弘農破沙苑皆有功河橋之戰諸
將退走熾時獨從兩騎為敵人追至芒山熾乃下馬背山
抗之俄而敵衆漸多矢下如雨熾騎士所執弓筈為敵人
所射破熾乃摠收其箭以射之所中人馬應弦而倒敵乃
相謂曰得此三人未足為功乃稍引退熾因其怠遂突圍

得出又從太保李弼討白額稽胡破之高仲容以北豫州
來赴熾從周文援之至洛陽會東魏人據芒山為陣周文
命留輜重於灃曲率輕騎奮擊中軍與右軍大破之悉虜
其步卒熾獨追至石濟而還大統十三年進使持節驃騎
大將軍開府儀同三司加侍中出為涇州刺史莅職數年
政號清靜改封安武縣公魏廢帝元年除原州刺史熾抑
挫豪右中理幽滯在州十載甚有政績州城北有泉熾
屢經游踐嘗與僚吏宴於泉側因酌水自飲曰吾在此州
唯當飲水而已及去職後人吏感其遺惠每至此泉者莫
不懷之恭帝元年進爵廣武郡公屬蠕蠕寇廣武熾與柱

國趙貴分路討之蠕蠕引退熾度河至趨伏川追及大破
之武成二年拜柱國大將軍周明帝以熾前朝舊臣勳望
兼重欲獨為造第熾辭以天下未平干戈未偃不宜歟發
徒役周明不許尋而帝崩事方得寢保定元年進封鄧國
公邑一萬戶別食資陽縣一千戶收其租賦天和五年自
大宗伯為宣州刺史先是周文田於渭北令熾與晉公護
分射走兕熾一日獲十七頭護十一頭護耻不及因以為
嫌至是熾又以周武年長有勸護歸政之議護惡之故左
遷焉及護誅徵拜太傅煇既朝之元老各均望素隆至於軍
國大謀常與參議嘗有疾周武帝幸其第問之因賜金石

之樂其見禮如此帝於大德殿將謀伐齊熾年已衰老乃
托腕曰臣雖朽邁請執干櫓首啓戎行得一覩誅翦鯨鯢
廓清寰宇省方觀俗登岳告成然後歸魂泉壤無復餘恨
帝壯其志節遂以熾第二子武當公恭為左二軍總管齊
平之後帝乃召熾歷觀相州宮殿熾拜賀曰陛下真不負
先帝矣帝大悅進位上柱國宣政元年兼雍州牧及周宣
營建東京以熾為京洛營作大監宮苑制度皆取決焉大
象初改食樂陵縣邑戶如舊隋文帝入輔政停洛陽宮作
熾請入朝屬尉遲迥舉兵熾乃移入金墉與洛州刺史平
涼公元亨同心固守仍權行洛陽鎮事相州平熾方入朝

屬文帝初為相國百寮皆勸進自以累世受恩遂不肯署
綬時人皆高其節及帝踐極拜太傅加殊禮贊拜不名開
皇四年八月薨時年七十八贈八州諸軍事冀州刺史謚
曰恭熾事親孝奉諸兄以悌順聞及其望位隆重而子孫
皆覩列位遂為當時盛族子茂嗣茂有第十三人恭威最
知名恭位至大將軍從周武平齊封贊國公除西兗州總
管以罪賜死熾兄善以中軍大都督南城公從魏孝武西
遷任至太僕衛尉卿汾北垂瀛三州刺史驃騎大將軍開
府儀同三司永富縣公謚曰忠子榮定嗣
榮定沉深有器量容貌魁偉美鬚髯便弓馬初為魏文帝

千牛備身周文帝見而奇之授平東將軍賜爵宜君縣子
後從周文與齊人戰於北芒周師不利榮定與汝南公宇文
文神慶帥精騎擊却齊師以功拜上儀同尋復以軍功進
位開府襲爵元富縣公除忠州刺史從王齊加上開府拜
前將軍似飛曰大夫其妻則隋文帝長姊安成長公主也
文帝少與之情契甚厚榮定亦知帝有人君之表允相推
結及帝作相領左右宮伯使鎮守天臺總統露門以兩相
仗衛常宿禁中遇尉遲迥初平朝延尉以山東為意拜榮
定為洛州總管以鎮之前後賜練四千匹西涼女樂一部
榮定受禪來朝賜馬三百匹部曲八十戶遣之坐事除名

主曰天子姊乃作田舍兒妻上不得已尋拜右武侯大將
軍上數幸其第恩錫甚厚每令尚食每日供羊一口珍珠
稱是以佐命功拜上柱國歷位寧州刺史右武侯大將軍
秦州總管賜兵樂一部突厥沙鉢略寇邊為行軍元帥三
總管出涼州與虜戰於高越原兩軍相持地無水土卒渴
甚至刺馬血而飲死者十二三榮定仰天太息俄而澍雨
軍復振於是進擊數挫其鋒突厥憚之請盟而去賜練萬
匹進爵安豐郡公復封子憲為安康郡公賜練五千匹歲
餘拜右武衛大將軍帝欲以為三公榮定上書固辭陳畏
懼之道帝乃止前後賞賜不可勝計及卒帝為之廢朝令

左衛大將軍元旻監護喪事賻絹三千匹上謂侍臣曰吾每欲致榮定於二重其人固讓不可今欲賜之重違其志於是贈冀州刺史陳國公諡曰懿子抗嗣抗美容儀性通率長於巧思父卒後因遇彌厚所賜錢帛金寶亦以鉅萬位定州刺史檢校幽州總管煬帝即位漢王誅反以為抗與通謀由是除名以其弟慶襲封陳公慶亦有姿容性和厚頗工草隸初封求富郡公位河東太守衛尉卿大業末為南郡太守為盜賊所害慶弟璉亦工草隸頗解鍾律位穎川南郡扶風太守熾兄子毅

毅字天武父岳早卒及毅著勲追贈大將軍冀州刺史毅深沉有器度重親以孝聞魏孝武初起家員外散騎侍郎時齊神武擅朝毅慨然有徇主之志從孝武西遷封奉高縣子從禽嘗泰復弘農戰少死皆有功進爵安武縣公恭帝元年進授驃騎大將軍開府儀同三司大都督改封永安縣公出為幽州刺史周孝閔帝踐阼進爵神武郡公保定三年拜大將軍時與齊人爭衡戎車歲動並交結突厥以為外援突厥已許納女於周齊人亦甘言重幣遣使求婚狄人便欲有悔朝廷乃令楊荐等累使結之往還十餘方復前好至是雖期往逆猶懼改圖以毅地兼勲厥素以威重乃令為使及毅至齊使亦在焉突厥君臣猶有貳志

毅抗言正色以大義責之累旬乃定卒以皇后歸朝議嘉
之別封成都縣公進位柱國歷同州刺史蒲金二州總管
加上柱國入為大司馬隋開皇初拜定州總管累居藩鎮
咸得人和二年薨於州贈襄郢等六州刺史人謚曰肅毅性
溫和每以謹慎自守文尚周文帝第五女襄陽公主特為
朝廷所委信雖任兼出內未嘗有矜情之六谷時人以比稱
焉子賢嗣

賢字託賢志業通敏少知名宣政元年授使持節儀同大
將軍開皇中襲爵神武公除遷州刺史毅第二女即大書
大穆皇后武德元年詔贈毅司空使持節總管荆郢等十

州諸軍事荊州刺史杞國公又追贈賢子紹宣秦州刺史
并襲賢爵紹宣無子仍以紹宣兄子德藏嗣

賀蘭祥字盛樂其先與魏俱起有乞伏者為賀蘭莫何弗
因以為氏後有以良家子鎮武川者遂家焉父初真少知
名為鄉閭所重尚文帝姊建安長公主保定二年追贈太
傅柱國常山郡公祥年十一而孤居喪合禮長於舅氏特
為周文帝所愛雖在戎旅常博延儒生教以書傳周文初
入關祥與晉公護俱在晉陽後乃遣使迎致之解褐奉朝
請少有膽氣志在立功尋擢補都督恒居帳下從平侯莫
陳悅又迎魏孝武以前後功封撫夷縣伯仍從擊潼關獲

東魏將薛長儒又攻回洛拔之還拜左右直長進爵爲公
大統九年從周文與東魏戰於芒山進位驃騎大將軍開
府儀同三司加侍中十四年除都督荊州刺史進爵博陵
郡公先是祥嘗行荊州事雖未暮月頗有惠政至是重往
百姓安之由是漢南流人襁負至者日有千數遠近蠻夷
莫不款附祥隨機撫納咸得其歡心時盛夏亢陽祥親巡
境內觀政得失見有發掘古墓暴露骸骨乃謂守令曰此
豈仁者爲政邪命所在收葬之即日澍雨是歲大有年境
內多古墓其俗好行發掘至是遂息祥雖周文密親性甚
清素州境南接襄陽西通岷蜀物產所出多諸珍異旣與

梁通好行李往來公私贈遺一無所受梁雍州刺史岳陽
王蕭譽欽其風素乃以竹屏風絺綌之屬及經史贈之祥
難違其意取而付諸所司周文後聞之竝以賜祥十六年
拜大將軍周文以涇渭溉灌之塹渠堰廢毀乃令祥修造
富平堰開渠引水東注於洛功用旣畢人獲其利魏廢帝
二年行華州事後改華州爲同州仍以祥爲刺史尋拜尚
書左僕射六官建授小司馬周孝閔帝踐阼進位柱國大
司馬時晉公護執政祥與護中表少相親愛軍國之事護
皆與祥參謀及誅趙貴廢閔帝祥有力焉武成初吐谷渾
侵涼州郡詔祥與宇文貴搃兵討之祥乃遣其軍司檄吐

谷渾與渾寅定王鍾留王等戰破之因拔其洮陽洪和二城以其地為洮州撫安西土振旅而還進封涼國公薨贈太師同岐等十二州諸軍事同州刺史謚曰景有七子敬讓璨師寬知名敬少歷顯職封化隆縣侯後襲爵涼國公位柱國華州刺史讓大將軍鄭州刺史河東郡公璨開府儀同三司宣陽郡公建德五年從於并州戰歿贈上儀同大將軍追封清都公師尚明帝女位上儀同大將軍幽州刺史博陵郡公寬開府儀同大將軍武始公又隋歷汴鄭二州刺史竝著政績祥弟隆大將軍平襄樂縣公隋文帝與祥有舊開皇初追贈上柱國

叱列伏龜字摩頭隋代郡西部人也其先為部落大人魏初入附遂世為第一領人酋長至龜五世龜容貌瓌偉嘗帶十圍進止詳雅兼有武藝嗣父業復為領人酋長魏孝昌三年以別將從長孫承業西征累遷金紫光祿大夫從還洛授都督遂為齊神武所寵任加授大都督沙苑之敗隨例來降周文帝以其豪門解縛禮之仍以邵惠公女妻之大統四年封長樂縣公自此常從征討亟有戰功歷侍中驃騎大將軍開府儀同三司相州刺史卒子椿嗣椿字千年明帝時位驃騎大將軍開府儀同三司改封永世縣公天和初除左官伯進位大將軍

閻慶字仁度河陰人也曾祖善仕魏歷龍驤將軍雲州鎮將因家雲州之盛樂郡祖提持節車騎大將軍敦煌鎮都大將父進有謀略勇冠當時正光中拜龍驤將軍屬衛可瓌作亂攻圍盛樂進率衆拒守以功拜盛樂郡守慶幼聰敏重然諾風儀端肅望之儼然隨父固守盛樂頗有力焉拜別將後以軍功拜步兵校尉中堅將軍既而齊神武舉兵入洛魏孝武西遷慶謂所親曰高歡將有篡逆之謀豈可苟安目前受其控制也遂以大統三年自宜陽歸闕稍遷後將軍封安次縣子以功進爵爲伯慶善於綏撫士卒未休未嘗先舍故能盡其死力屢獲勳勞累遷散騎常侍

驃騎大將軍開府儀同三司雲州大中正加侍中賜姓大

野氏周孝閔帝踐阼出爲河州刺史進爵石保縣公州居河外地接戎夷慶留心撫納頗稱簡惠就拜大將軍進爵太安郡公入爲小司空歷雲寧二州刺史慶性寬和不苛察百姓悅之天和五年進位柱國晉公護母慶之姑也護雖擅朝而慶未嘗阿附及護誅武帝以此重之詔慶第十子毗尚帝女清都公主慶雖位望隆重婚連帝室常以謙慎自守時以此稱之建德二年抗表致事優詔許焉慶既衰老恒嬰沉痾宣帝以其先朝耆舊特異恒倫乃詔靜帝至第問疾賜布千匹醫藥所須令有司供給大象二年

拜上柱國隋文帝踐極又令皇太子就第問疾仍供醫藥之費開皇二年薨年七十七贈司空七州諸軍事荊州刺史謚曰成長子常先慶卒次子毗嗣

毗七歲襲爵石保縣公及長儀貌矜嚴頗好經史受漢書於蕭該略通大旨能篆書草隸尤善為當時之妙周武帝見而悅之命尚清都公主宣帝即位拜儀同三司隋文帝受禪以技藝侍東宮數以瑰麗之物取悅於皇太子由是甚見親待每稱之於上尋拜車騎宿衛東宮上嘗遣高熲大閱於龍臺澤諸軍部伍多不齊整唯毗一軍法制肅然熲言之於上特蒙賜帛俄兼太子宗衛率長史尋加尚儀

同太子服翫之物多毗所為及太子廢毗坐杖一百與妻子俱配為官奴婢二歲赦免煬帝嗣位盛修軍器以毗性巧練習舊事詔典其職士皆授朝請卽毗立議輦輅車輿多所增損擢拜起部郎帝嘗大備法駕嫌屬車太多顧謂毗曰開皇之日屬車十二乘於事亦得今八十一乘以牛駕車不足以益文物朕欲減之從何為可毗曰臣初定數共宇文愷參詳故實據漢胡伯始蔡邕等議屬車八十一乘此起於秦遂為後式故張衡賦云屬車九九是也次及法駕三分減一為三十六乘此漢制也又據宋孝建時有司奏議晉遷江左唯設五乘尚書建平王宏曰八十一乘義

兼六國三十六乘無所准憑江左五乘儉不中禮但帝王
 文物旂旒之數爰及冕玉皆用十二今宜准此設十二乘
 開皇平陳因以為法今憲章徃古大駕依秦法駕依漢小
 駕依宋以為差等帝曰何用秦法大駕宜三十六法駕宜
 十二小駕除之毗研精故事皆此類也長城之役毗摠其
 事及帝有事恒岳詔毗營立壇場尋轉殿內丞從幸張掖
 郡高昌王朝于行所詔毗持節迎勞遂將護入東都尋以
 毋憂去職未朞起令視事將興遼東之役自洛口開渠達
 涿郡以通漕毗督其役明年兼領右翊衛長史營建臨朔
 宮及征遼東以本官領武賁即將典宿衛時軍圍遼東城
 帝令毗詣城下宣諭賊乃驚亂發流矢中所乘馬毗名色

不變辭氣抑揚卒事而去遷殿內少監又領將作少監後
 復從帝征遼東會楊玄感作逆帝班師從至高陽郡卒帝
 甚悼惜之贈殿內監史寧字求和建康袁氏人也曾祖豫
 仕沮渠氏為臨松令魏平涼州祖灌隨例遷於撫寧鎮因
 家焉父遵初為征虜府鎧曹參軍杜洛周構逆六鎮自相
 屠陷遵遂率鄉里奔恒州其後恒州為賊所敗遵後歸洛
 陽拜樓煩郡守及寧著勲贈散騎常侍征西大將軍涼州
 刺史謚曰貞寧少以軍功累加持節征東將軍金紫光祿
 大夫賀拔勝為荊州刺史寧以本官為勝軍司隨勝部會

荆蠻騷動三鴟路絕寧先驅平之因撫慰蠻左翕然降附
尋除南郢州刺史及勝為大行臺表寧為大都督攻梁下
澁成破之封武平縣伯又攻拔梁齊興鎮等九城未及論
功屬孝武西還東魏遣侯景寇荊州寧隨勝奔梁梁武帝
引寧至香蹬前謂之曰觀卿風表終是富貴我當使卿衣
錦還鄉寧答曰臣世荷魏恩位為列將天長喪亂本朝傾
覆不能北面事逆賊幸得息肩有道儻如明詔欣幸實多
因涕泣橫流梁武為之動容在梁二年勝乃與寧密圖歸
計寧曰朱異既為梁主所信任請往見之勝然其言寧乃
見異申以投分之言微託思歸之意辭氣雅三言亦皆絕

為奏梁主果許勝等歸大統二年自梁歸進爵為侯久之
遷車騎將軍行涇州事時賊帥莫折後熾寇掠居人寧率
州兵與行原州事李賢討破之轉東義州刺史東魏亦以
胡梨苟為東義州刺史寧僅得入州梨苟亦至寧逆擊破
之斬其洛安郡守馮善道州既隣接疆場百姓流移寧留
心撫慰咸來復業轉涼州刺史寧未至而前刺史宇文仲
和據州作亂詔獨孤信與寧討之寧先至涼州為陳禍福
城中吏人皆相率降附仲和仍據城不下尋亦剋之後遷
驃騎大將軍開府儀同三司加侍中進爵為公十六年宕
昌叛羌獠甘作亂逐其王彌定而自立并連結傍乞鐵忽

及鄭五醜等詔寧率軍與宇文貴盧瑩等討之寧別擊
獠甘而山路險阻纔通單騎獠甘已分其黨立柵守險寧
進兵攻之遂破其柵獠甘將百騎走投生羌鞏廉玉彌定
遂得復位寧以未獲獠甘遂進軍大破之生獲獠甘徇而
斬之并執鞏廉玉遠關所得軍實悉分賞將士寧無私焉
師還召寧率所部鎮河陽寧先在涼州戎夷服其威惠遷
鎮之後邊人竝思慕之魏廢帝元年復除梁甘瓜三州諸
軍事涼州刺史初蠕蠕與魏和親後更離叛尋為突厥所
破殺其王阿那瓌部落逃逸者仍奉瓌之子孫抄掠河右
寧率兵邀擊獲瓌子孫二人并其種落酋長自是每戰破

之前後數萬人進爵安政郡公二年吐谷渾通使於齊寧
擊獲之就拜大將軍寧後遣使詣周文帝請事周文即以
所服冠履衣被及弓箭甲等賜寧謂其使人曰為我謝涼
州孤解衣以衣公推心以委公善始令終無損功名也時
突厥木汗可汗假道涼州將襲吐谷渾周文令寧率騎隨
之軍至番禾吐谷渾已覺奔於南山木汗將分兵追之令
俱會於青海寧謂木汗曰樹敦賀真二城是吐谷渾巢穴
今若拔其本根餘種自然離散此上策也木汗從之即分
為兩軍木汗從北道向賀真寧趣樹敦渾娑周王率衆逆
戰寧擊斬之踰山履險遂至樹敦樹敦是渾之舊都多諸

珍藏而渾主先已奔賀真留其征南王及數千人固守寧
進兵攻之偽退渾人果開門逐之因回兵奮擊兩未及闔
寧兵遂得入生獲其征南王俘虜男女財寶盡歸諸突厥
渾賀羅拔王依險爲柵欲塞寧路寧攻破之木汗亦破賀
真虜渾主妻子大獲珍物寧還軍於青海與木汗會木汗
握寧手歎其勇決并遺所乘良馬令寧於帳前乘之木汗
親自步送突厥以寧所圖必破皆畏憚之咸曰此中國神
智人也及將班師木汗又遺寧奴婢一百口馬五百匹羊
一萬口寧及還州尋被徵入朝屬周文帝崩寧悲慟不已
乃請赴陵所盡哀并告行師尅捷周孝閔帝踐阼拜少司
徒出爲荊州刺史荆襄沂鄆等五十二州及江陵鎮防諸
軍事寧有謀畫識兵權臨敵指擣皆如其策甚得當時之
譽及在荊州頗自奢縱貪濁不脩法度嘗出有人訴州佐
屈法寧還付被訟者治之自是有事者不敢復言聲名大
損於西州保定三年卒於州謚曰烈子雄嗣
雄字世武少勇敢旅力過人便弓馬有筭略年十四從寧
於牽屯山奉迎周文帝仍從校獵弓無虛發周文歎異之
尋尚周文女永富公主除使持節驃騎大將軍開府儀同
三司累遷駕部中大夫司馭中大夫從柱國枹罕公卒威
鎮金城遂卒於軍時年二十四雄第祥

祥字世休少有文武才幹仕周太子車右中士襲爵武遂
縣公隋文帝踐阼拜儀同領交州事進爵陽城郡公在州
頗有惠政轉驃騎將軍伐陳之役從宜陽公主世積出九
江道破陳師進拔江州文帝大悅下詔慰勉之進位上開
府尋拜蘄州刺史遷蘄州總管徵拜左領軍將軍復以行
軍總管從晉王廣破突厥於靈武遷右衛將軍仁壽中率
兵屯弘化以備胡煬帝時在東宮遺祥書論舊行兵時事
申以恩旨祥為書陳謝太子甚親遇之及即帝位漢王諒
作亂遣其將綦母良自滏口徇黎陽塞白馬津余公理自
太行下河內帝以祥為行軍總管軍於河陰久不得濟祥

謂軍吏曰余公理輕而無謀又新得志謂其衆曰待遇
心驕且河北人先不習兵所請擁市人而戰不定圖也
令軍中修攻具公理使諜知之果屯兵於河陽內城以備
祥於是艤船南岸公理聚甲當之祥乃簡精銳於下流潛
度公理拒之未成列祥縱擊大破之東趨黎陽討綦母良
良棄軍走其衆大潰進位上大將軍賜練絲七千段女奴
十人良馬二十疋轉太僕卿帝嘗賜祥詩曰伯匪朝寄重
夏侯親遇深貴耳唯聞古賤口詎知今早爵勤苦實久有
背淮心掃逆黎山外振旅河之陰功已書王府留情太僕
箴祥上表辭謝帝手詔曰昔歲勞公問罪河朔賊爾日塞

兩關之路據倉阻河公竭誠奮勇一舉而剋故聊示所懷
亦何謝也尋遷鴻臚卿從征吐谷渾岍出玉門道擊虜破
之進位右光祿大夫拜右驍衛大將軍又征遼東出蹋頓
道不利由是除名俄拜燕郡太守被賊高開道所圍城陷
開道甚禮之會開道與羅藝通和送祥於涿郡卒於塗子
義隆永年令祥弟雲字世高亦以父勲賜爵武平縣公歷
位司職下大夫儀同大將軍萊州刺史雲弟威字世儀亦
以父勲賜爵武當縣公

權景宣字暉遠天水顯親人也父曇騰魏隴西郡守贈秦
州刺史景宣少聰悟有氣俠宗黨皆歎異之年十七魏行

臺蕭寶夤見而奇之表為輕車將軍及寶夤敗景宣歸鄉
里周文帝平隴右擢為行臺郎中孝武西遷授鎮遠將軍
步兵校尉加平西將軍秦州大中正大統初轉祠部郎中
景宣曉兵權有智略從周文拔弘農破沙苑首先登陷陣
轉外兵郎中從開府于謹援洛陽景宣督課糧儲軍以周
濟時初復洛陽將修繕宮室景宣率徒三千先出採運會
東魏兵至司州牧元季海等以衆少按還屬城悉叛道路
擁塞景宣將二十騎且戰且走從騎略盡景宣輕馬突圍
手執數級馳而獲免因投人家自匿景宣以久藏非計乃
為周文書招募得五百餘人保據宜陽誓言大軍續至

東魏將段琛等率衆至九曲憚景宣不敢進景宣恐琛審其虛實乃將腹心自隨詐云迎軍因得西道與儀同李延孫相會攻拔孔城洛陽以南尋亦來附周文即留景宣守張白塢節度東南義軍東魏將王元軌入洛景宣與延孫等數手走之以功授大行臺左丞進屯宜陽攻襄城拔之獲郡守王洪顯周文嘉之徵入朝錄前後功封顯親縣男除南陽郡守郡隣敵境舊制發人守防三十五畝多廢農桑而姦宄猶作景宣至竝除之唯修起城樓多備器械寇盜歛迹人得肄業焉百姓稱之立碑頌德周文特賞粟帛以旌其能遷廣州刺史侯景舉河南來附景宣縱僕射王吉

政經略應接既而侯景南叛恐東魏復有其地以景宣爲大都督豫州刺史鎮樂口東魏亦遣張伯德爲刺史伯德令其將劉貴平率其戍卒及山蠻屢來攻逼景宣兵不滿千人隨機奮擊貴平乃退走進授使持節車騎大將軍儀同三司潁川陷後周文以樂口等諸城道路阻絕悉令拔還襄州刺史杞秀以狼狽獲罪景宣號令嚴明戎旅整肅所部全濟獨被優賞仍留鎮荊州委以鷄南之事初梁岳陽王蕭詵將以襄陽歸朝仍勒兵攻梁元帝於江陵詵叛將杜岸乘虛襲之景宣乃率騎三千助詵因是乃送其妻王氏及子寮入質景宣又與開府楊忠取梁將柳仲禮拔

安陸隨郡父之隨州城人吳士英殺刺史黃道王因聚爲
寇景宣以英小賊可以計取之若聲其罪恐同惡者衆廼
與英書僞稱道王凶暴歸功英等英等果信之遂相率而
至景宣執而戮之獲其黨與進攻應城拔之獲夏侯珍洽
於是應禮安隨並平朝議以景宣威行南服廼授并安肆
郢新應六州諸軍事并州刺史尋進驃騎大將軍開府儀
同三司加侍中兼督江北司二州諸軍事進爵爲伯唐州
蠻田魯嘉自號豫州伯引至齊兵大爲人害景宣又破之
獲魯嘉以其地爲郡轉安州刺史梁定州刺史李洪遠初
款後叛景宣惡其懷貳密襲破之虜其家口及部衆洪遠
脫身走免自是酋帥懼服無敢叛者燕公于謹征江陵景
宣別破梁司空陸法和司馬羊亮於涇水又遣別帥攻拔
魯山多造舟艦益張旗幟臨江欲度以懼梁人梁將王琳
在湘州景宣遺書喻以禍福琳遂遣長史席整因景宣請
舉州款附周孝閔帝踐阼徵爲司憲中大夫尋除基郡硤
平四州五防諸軍事江陵防主加大將軍保定四年晉公
護東討景宣別略河南齊豫州刺史王士良永州刺史蕭
世怡並以城降景宣以開府謝徹守永州開府鄭彥守豫
州以士良世怡及降卒一千人歸諸京師尋而洛陽不守
乃棄二州拔其將士而還至昌州而羅陽蠻反景宣回軍

破之還次霸上晉公護親迎勞之天和初授荊州刺史總
管十七州諸軍事進爵千金郡公陳湘州刺史華皎舉州
款附表請援兵敕景宣統水軍與皎俱下景宣到夏口陳
人已至而景宣以任遇隆重遂驕傲縱恣多自矜伐兼納
賄貨指麾節度朝出夕改將士憤怒莫肯用命及水軍始
交一時奔北戰艦器仗略無孑遺時衛公直總督諸軍以景
宣負敗欲繩以軍法朝廷不忍加罪遣使就軍赦之尋遇
疾卒贈河渭鄆三州刺史謚曰恭子如璋嗣位至開府膠
州刺史如璋弟仕玠儀同大將軍廣川縣侯

論曰王盟始以親黨升朝終而才能進達勤宣運始位列

周行實參迹於功臣蓋弗由於忌澤詎文武奇才以剛正
見忌有隋受命鬱鬱為名臣末路落獨信有終之克鮮獨孤
信威申南服化洽西州信著遐方尤昭隣國雖不免其身
慶延于後三代外戚何其盛歟實熾儀表魁梧器識雄遠
入參朝政則嘉謀屢陳出總藩條則惠政斯洽毅忠肅奉
上溫恭接下茂實彰於本朝義聲播於殊俗竝以國章人
望論道當官榮映一時慶流來葉及熾遲疑勸進有送茲
之心雖王公恨恨何以加此榮定以功懋賞以勞定國保
其祿位貽厥子孫盛矣賀蘭祥叱列伏龜閣慶等雖階綠
威屬各以功名自終而毗制造之功亦足傳於後葉史鑑

權景宣竝以將帥之才受內外之寵總戎薄伐著剋敵之功布政莅人垂稱職之譽若此者豈非有國之良翰歟然而史在末年貨財虧其雅志權亦晚節矜驕喪其威聲惜矣楊諒于紀祥獨剋之効亦足稱云爾

列傳第四十九

北史六十一

列傳第五十

北史六十二

王羆

孫長述

王思政

尉遲迴

弟綱

綱子運

王軌

樂運

王羆字熊羆京兆霸城人漢河南尹遵之後世為州郡著姓羆質直木彊處物平當州閭敬憚之魏太和中除殿中將軍稍遷雍州別駕清廉疾惡勵精公事刺史崔亮有知人之鑒見羆雅相欽挹亮後轉定州啓羆為長史執政者恐羆不稱不許及梁人寇碓石亮為都督南討復啓羆為

長史帶銳軍朝廷以亮頗舉熊故當可用及剋破石熊功
居多先是南岐東益氏羌反叛乃拜熊冠軍將軍鎮梁州
討平諸賊還授西河內史辭不拜時人謂曰西河大邦奉
祿優厚何為致辭熊曰京洛材木盡出西河朝貴營第宅
者皆有求假如其私辦則力所不堪若科發人間又違犯
憲法以此致辭耳後以軍功封定陽子除荊州刺史梁復
遣曹義宗圍荊州堰水灌城不沒者數版時既內外多虞
未遑救援乃遺熊鐵券云城全當授本州刺史城中糧盡
熊乃煮粥與將士均令食之每出戰常不擐甲 日大呼告
天曰荊州城孝文皇帝所置天若不祐國家使 前中王熊

額不爾王熊頂破賊屢經戰陣亦不被傷彌歷三年義宗
方退進封霸城縣公元顥入洛以熊為左軍大都督顥敗
莊帝以熊受顥官故不得本州更除岐州刺史時南秦數
叛以熊行南秦州事熊至州召其魁帥為腹心擊捕反者
略盡乃謂魁帥等曰汝黨皆死盡何用活為乃以次斬之
自是南秦無復反者又詔熊行秦州事尋遷涇州刺史未
及之部屬周文帝徵兵為勤王之舉熊請前驅効命遂為
大都督鎮華州孝武西遷進車騎大將軍儀同三司別封
萬年縣伯乃除華州刺史齊神武率軍潼關人懷危懼熊
勸勵將士衆心乃安神武退拜驃騎大將軍加侍中開府

嘗修州城未畢梯在城外神武遣韓軌司馬子如從河東
霄濟襲罷罷不覺比曉軌衆已乘梯入城罷尚卧未起聞
閣外洶洶有聲便袒身露髻徒跣持一白棒大呼而出謂
曰老罷當道卧貉子那得過敵見驚退逐至東門左右稍
集合戰破之軌遂投城遁走文帝聞而壯之時關中大饑
徵稅人間穀食以供軍費或隱匿者令遞相告多被笞捶
以是人有逃散唯罷信著於人莫有隱者得粟不少諸州
而無怨讟沙苑之役神武士馬甚盛文帝以華州衝要遣
使勞罷令加守備及神武至城下謂罷曰何不早降罷乃
大呼曰此城是王罷家死生在此欲死者來神武不敢攻
後移鎮河東以前後功進爵扶風郡公河橋之戰王師不
利趙青雀據長安城所在莫有固志罷乃大開州門召城
中戰士謂曰如聞天子敗績不知吉凶諸人相驚惑有異
望王罷受委於此以死報恩諸人若有異圖可來見殺必
恐城陷沒者亦任出城如有忠誠能與王罷同心可共固
守軍人見其誠信皆無異心及軍還徵拜雍州刺史時蠕
蠕度河南寇候騎已至幽州朝廷慮其深入乃徵發士馬
屯守京城漸諸街巷以備侵軼右僕射周惠達召罷議之
罷不應命卧而不起謂其使曰若蠕蠕至渭北者王罷率
鄉里自破之不煩國家兵何為天子城中遂作如此驚動

由周家小兒恇怯致此。熊輕侮權貴，守正不回，皆此類也。未幾還鎮河東，熊性儉率，不事邊幅，嘗有臺使至，熊為設食，使乃裂去薄餅，緣熊曰：耕種收獲，其功已深，春饗造或用力不少，爾之選擇當是未饑，命左右撤去之。使者愕然大慙。又客與熊食瓜，客削瓜皮，侵肉稍厚，熊心嫌之，及瓜皮落地，乃引手就地取而食之。客甚愧色。性又嚴，嘗有吏挾私陳事者，熊不暇命捶扑，乃手自取鞭，履持以擊之。每至享會，自秤量酒肉，分給將士。時人尚其均平，嗤其鄙碎。熊舉動率情，不為巧詐。凡所經處，雖無當時功迹，咸去後見。思卒于官，贈太尉、都督、相、翼等十州刺史，謚曰忠。熊安於貧素，不營生業。後雖貴顯，鄉里舊宅不改。衡門身死之日，家甚貧罄。當時伏其清潔，于慶遠弱冠以功臣子拜直閣將軍。先罷卒，孫述。

述字長述，少孤，為祖熊所養，聰敏有識度。年八歲，周文帝見而奇之，曰：王公有此孫，足為不朽。解褐，負外散騎侍郎，封長安縣伯。罷薨，居喪過禮，有詔褒之，免喪，襲封扶風郡公。除中書舍人，修起居注，改封龍門郡公。周受禪，拜實部下大夫，累遷廣州刺史。甚有威惠，朝議嘉之，就拜大將軍。後歷襄仁二州總管，並有能名。隋文帝為丞相，授信州總管，位上將軍。王謙作亂，遣使致書於長述，因執其使，上書。

又陳取謙策上大悅前後賜金五百兩授行軍總管討謙以功進位柱國開皇初獻平陳計脩營戰艦為上流之師上善其能頻加賞勞後數歲以行軍總管擊南寧未至而卒上甚傷惜之贈上柱國冀州刺史謚曰莊子謨嗣謨弟軌大業末郡守少子文禧起部郎

王思政太原祁人漢司徒允之後也自魏太尉凌誅後冠冕遂絕文祐州主簿思政容貌魁梧有籌策解褐負外散騎侍郎屬方俟醜奴宿勤明遠等擾亂關右北海王顥討之聞思政壯健啓與隨軍所有謀議竝與參詳時孝武在藩宗聞其名乃引為賓客遇之甚厚及登六位委以心膂

預定策功封祁縣侯為武衛將軍俄而齊神武潛有異圖帝以思政可任大事拜使持節中軍大將軍大都督總宿衛兵思政乃言於帝曰洛陽四面受敵非用武之地關中有崤函之固且士馬精疆宇文夏州結合同盟願立功效若聞車駕西幸必當奔走奉迎藉天府之資因已成之業二年脩復舊京何慮不克帝深然之及神武兵至河北帝乃西遷進爵太原郡公拜光祿卿并州刺史加散騎常侍大都督大統之後思政雖被任委自以非相府之舊每不自安周文帝曾在同州與郡公宴集出錦罽及雜綾絹數千段令諸將擣蒲取之物盡周文又解所服金帶令諸人

遍擲曰先得盧者即與之群公擲將遍莫有得者次至思
政乃歛容跪而誓曰王思政羈旅歸朝蒙宰相國士之遇
方願盡心効命上報知己若此誠有實令宰相賜知者願
擲即為盧若內懷不盡神靈亦當明之使不作也便當殺
身以謝所奉辭氣慷慨一座盡驚即拔所佩刀橫於膝上
攬擣蒲拊髀擲之比周文止之已擲為盧矣徐乃拜而受
帶自此朝寄更深及河橋之戰思政下馬用長稍左右橫
擊一擊踣數人時陷陣既深從者死盡思政被重創悶絕
會日暮敵亦收軍思政久經軍旅每戰唯著破衣弊甲敵
人疑非將帥故得免有帳下督雷五安於戰處哭求思政

會已蘇遂相得乃割衣裹創扶思政上馬夜以方
仍鎮弘農除侍中東道行臺思政以玉壁地險要請築城
即自營度移鎮之遷汾晉并三州諸軍事并州刺史行臺
如故仍鎮玉壁八年東魏復來寇卒不能克以全城功授
驃騎大將軍開府儀同三司高仲密以北豫州來附周文
親接援之乃驛召思政將鎮成臯未至而班師復命思政
鎮弘農思政入弘農令開城門解衣而卧慰勉將士示不
足畏數日後東魏將劉豐生率數千騎至城下憚之不敢
進乃引軍還於是脩城郭起樓櫓營田農積芻秣凡可以
守禦者皆具焉弘農之有備自思政始也十二年加特進

兼尚書左僕射行臺都督荊州刺史境內平濕城塹多壞
思政乃命都督蘭小歡督工匠繕脩之掘得黃金三十斤
夜中密送至旦思政召佐史以金示之曰人臣不宜有私
悉封金送上周文嘉之賜錢二十萬思政之去王室也周
文命舉代人思政乃進所部都督韋孝寬其後東魏來寇
孝寬卒能全城時論稱其知人十三年侯景叛東魏請援
乞師當時未即應接思政以為若不因機進取後悔無及
即率荊州步騎萬餘從魯關向陽翟周文聞思政已發乃
遣大尉李弼赴潁川東魏將高岳等聞大兵至收軍而遁
思政入守潁川景引兵向豫州外稱略地乃密遣送款於

梁先是周文遣帥都督賀蘭願德助景扞禦景既有異圖
因厚撫願德等異為己用思政知景詭詐乃密追願德思
政分布諸軍據景七州十二鎮周文乃以所授景使持節
太傅大將軍兼尚書令河南大行臺河南諸軍事回授思
政思政竝讓不授頻使敦喻唯受河南諸軍事十四年拜
大將軍九月東魏大尉高岳行臺慕容紹宗儀同劉豐生
等率步騎十萬來攻潁川殺傷甚衆岳又築土山以臨城
城中飛梯火車盡攻擊之法思政亦作火積因迅風便投
之土山又射以火箭燒其攻具仍募勇士縋而出戰據其
兩土山置樓堞以助防守齊文襄更益兵堰洧水以灌城

時雖有恠獸每衝壞其堰然城被灌已久多亦崩頽岳悉
衆苦攻思政身當矢石與士卒同勞苦岳乃更脩堰作鐵
龍雜獸用厭水神堰成水大至城中泉涌溢懸釜而炊糧
力俱竭慕容紹宗劉豐生及其將慕容永珎意以爲閑共
乘樓船以望城內令善射人俯射城中俄而大風暴起船
乃飄至城下城上人以長鈎牽船弓弩亂發紹宗窮急透
水而死豐生浮向土山復中矢而斃禽永珎并獲船中器
械思政謂永珎曰僕之破亡在於畧漏誠知殺卿無益然
人臣之節守之以死乃流涕斬之并收紹宗等尸以禮埋
瘞岳既失紹宗等志氣沮喪不敢逼城齊文襄聞之乃率

步騎十萬來攻思政知不濟率左右據土山因仰天大哭
左右皆號慟思政西向再拜便欲自剄先是文襄告城中
人曰有能生致王大將軍者封侯重賞若大將軍身有損
傷親近左右皆從大戮都督駱訓固止之不得引決齊文
襄遣其通直散騎常侍趙彥深就土山遺以白羽扇而說
之牽手以下引見文襄辭氣慷慨涕淚交流無撓屈之容
文襄以其忠於所事起而禮之接遇甚厚其督將分禁諸
州地牢數年盡死思政初入潁川士卒八千人被圍既久
城中無鹽腫死者十六七及城陷之日存者纔三千人雖
外無救援遂無叛者思政常以勤王爲務不營貨產嘗被

賜園地思政出征後家人種桑果雜樹及還見而怒曰匈奴未滅去病辭家况大賊未平欲事產業豈所謂憂公忘私邪命左右投而棄之故身陷之後家無蓄積及齊文宣受東魏禪以思政為都官尚書儀同三司卒贈以本官加兗州刺史初思政在荊州自武關以南延袤一千五百里置三十餘城並當衝要之地凡所舉薦咸得其才子康沈毅有度量後為周文親信思政陷後詔以因水城陷非戰之罪增邑三千五百戶以康襲爵太原公除驃騎大將軍侍中開府儀同三司康弟揆先封中都縣侯增邑通前一千五百戶進爵為公揆弟邠封西安縣侯刊弟恭忠誠縣

伯恭弟幼顯親縣伯康姊封齊郡君康兄元遜亦陷於魏川封其子景晉陽縣侯康抗表固讓不許十六年王師東討加康使持節大都督以思政所部兵皆配之魏廢帝二年隨尉遲迴征蜀鎮天水郡尋賜姓拓王氏為鄜州刺史武成末除匠師中大夫轉載師保定二年歷安襄二州總管位柱國入隋終於汴州刺史

尉遲迴字薄君羅代人也其先魏之別號尉遲部因而氏焉父俟堯性弘裕有鑒識尚周文帝姊昌樂大長公主生迴及綱迴年七歲綱年六歲俟堯病且卒呼二子撫其首曰汝等並有貴相但恨吾不見耳各勉之武成初追贈柱

國大將軍太傅長樂郡公謚曰定迴少聰敏美容儀及長
有大志好施愛士尚魏文帝女金明公主拜駙馬都尉封
西部侯大統十一年拜侍中驃騎大將軍開府儀同三司
進爵魏安郡公十五年遷尚書左僕射兼領軍將軍迴通
敏有幹能雖任兼文武頗允時望周文以此深委仗焉十
六年拜大將軍侯景之渡江也梁元帝時鎮江陵請脩隣
好其弟武陵王紀在蜀稱帝率衆東下將攻之梁元帝大
懼移書請救周文曰蜀可圖矣取蜀制梁在茲一舉乃與
群公會議諸將多有異同唯迴以爲紀既盡銳東下蜀必
空虛王師臨之必有征無戰周文以爲然謂曰伐蜀之事

一以委汝於是令迴督開府元珍乙弗亞侯呂陵始叱奴
興其連雄宇文昇等六軍甲士聚晉壽開平林舊道迴前
軍臨劔閣紀安州刺史樂廣以州先降紀梁州刺史楊乾
運時鎮潼水先已遣使詣闕密送誠款然恐其下不從猶
據潼水別管拒守迴遣元珍侯呂陵始等龍之乾運還保
潼川玠等遂圍之乾運降迴至涪川大鄉餐將士度涪江至
青溪谷南原勒兵講武脩繕約束閱器械自開府以下賞
金帛各有差時夏中連雨山路峻峻將士疲病者十二三
迴親自勞問加以湯藥引之而西紀益州刺史蕭撫嬰城
自守進軍圍之初紀至巴郡遣前南梁州刺史史欣景幽

州刺史趙拔扈等為搆外援迴分遣元珙乙弗亞等擊破之拔扈等遁走欣景遂降搆被圍五旬頻戰為迴所破遣使乞降許之搆乃與紀子宜都王圓庸率其文武詣軍門請見迴以禮接之其吏人等各令復業唯收僮隸及儲積以賞將士號令嚴肅軍無私馬詔以迴為大都督益潼等十二州諸軍事益州刺史三年加督六州通前十八州諸軍事以平蜀功封一子安固郡公自劔閣以南得承制封拜及黜陟迴乃明賞罰布恩威公女輯新邦經略未附人夷懷而歸之性至孝色養不怠身雖在外所得四時甘脆必先薦奉然後敢嘗大長公主年高多病迴往在京師每退朝參候起居憂悴形於容色大長公主每為之和顏進食以寧迴心周文知其至性徵迴入朝以慰其母意遣大鴻臚郊勞仍賜迴衮冕之服蜀人思之為立碑頌德六官初建拜小宗伯周孝閔帝踐阼進位柱國大將軍以迴有平蜀功同霍去病冠軍之義改封寧蜀公遷大司馬尋以本官鎮隴右武成元年進封蜀國公邑萬戶除秦州總管秦

渭等十四州諸軍事隴右大都督保定二年拜大司馬及晉公護東伐迴帥師攻洛陽齊王憲等軍於芒山齊衆度河諸軍驚散迴率麾下反行却敵於是諸將遂得全師而還遷太保太傅建德初拜太師尋加上柱國宣帝即位以

迴為大右軍轉大前疑出為相州總管宣帝崩隋文帝輔
政以迴位望宿重懼為異圖乃令迴子魏安郡公惇齎詔
書以會葬徵迴尋以鄭國公韋孝寬代迴為總管迴以隋
文帝當權將圖篡奪遂謀舉兵留惇而不受代隋文帝又
令候正破六韓裒詣迴喻旨密與總管府長史晉昶等書
令為之備迴聞之殺昶集文武士庶等登城北樓而令之
於是眾咸從命莫不感激乃自稱大總管承制署官司于
時趙王昭已入朝留少子在國迴又奉以號令迴弟子大
將軍成平郡公勤時為青州總管初得迴書表送之尋亦
從迴迴所管相衛黎毛洺貝趙冀瀛滄勤所統青齊膠兗

莒諸州皆從之眾數十萬榮州刺史邵國公宇文弼由州
刺史李惠東楚州刺史費也利進國東潼州刺史曹孝達
各據州以應迴徐州總管司錄席毗與前東平郡守畢義
緒據兖州及徐州之蘭陵郡亦以應迴永橋鎮將紇豆陵
惠以城降迴迴又北結高寶寧以通突厥南連陳人許割
江淮之地隋文帝於是徵兵討迴即以韋孝寬為元帥陰
羅雲監諸軍郝國公梁士彥樂安公元諧化政公宇文忻
濮陽公宇文述武鄉公崔弘度清河公楊素隴西公李詢
延壽公子仲文等皆為行軍總管迴遣所署大將軍石孫
攻建州刺史宇文弁以州降遂迴又遣西道行臺韓長業

攻潞州執刺史趙威署城人郭子勝為刺史上儀同赫
連士猷攻晉州即據小鄉城紇豆陵惠襲陷定州之鉅鹿
郡遂圍恒州上大將軍宇文威攻汴州上開府荅州刺史
烏丸尼開府尉遲偁率膠光青齊莒兗之眾圍沂州大將
軍檀讓攻陷曹亳二州屯兵梁郡大將軍東南道行臺席
毗衆號八萬軍於藩城攻陷昌慮下邑豐縣李惠自申州
攻宋州焚之而還宇文胄軍於洛口開府梁子康攻懷州
魏安公惇率眾十萬人入武德軍於沁東孝寬等諸軍隔
水相待不進隋文帝又遣高熲馳驛督戰惇布兵二十餘
里麾軍以待孝寬軍半度而擊之孝寬因其却乃鳴
鼓齊進惇遂大敗孝寬棄賊進至鄴迴與其子惇祐等又
悉其卒十三萬陣於城南迴別統萬人皆綠巾錦襖號曰
黃龍兵勤率眾五萬自青州赴迴以三千騎先到迴舊集
軍旅雖老猶被甲臨陣其麾下兵皆關中人為之力戰孝
寬等軍失利而却鄴中士女觀者如堵高熲與李詢乃整
陣先犯觀者因其擾而乘之迴眾大敗遂入鄴城迴走保
北城孝寬縱兵圍之李詢賀婁子幹以其屬先登迴上樓
射殺數人乃自殺勤惇祐等東走青州未至開府郭衍追
及之竝為衍所獲隋文帝以勤初有誠款特釋之李惠先
是日縛歸罪隋文帝復其官爵迴末年衰老感於後妻王

氏而諸子多不睦及起兵以開府小御正崔達等爲長史
自餘委任亦多用齊人達等文士無籌略舉措多失綱紀
不能匡救迥自起兵至于敗凡經六十八日焉子寬大將
軍長樂郡公先迥卒寬兄誼開府資中郡公寬弟順以迥
平蜀功授開府安固郡公後以女爲宣帝皇后拜上柱國
封胙國公順弟惇軍正下大夫魏安郡公惇弟祐西都郡
公皆被誅而誼等諸子以年幼竝獲全武德中迥從孫庫
部員外郎耆福上表請改葬朝議以迥忠於周室有詔許
焉仍贈絹百匹迥弟綱

綱字婆羅少孤與兄迥依託舅氏周文帝西討關隴迥綱

與母昌樂大長公主留于晉陽後方入關從周文征伐常
陪侍帷幄出入卧內以軍功封廣宗縣伯綱驍果有膂力
善騎射周文甚寵之委以心膂河橋之戰周文馬中流矢
因而驚奔綱與李穆等左右力戰衆皆披靡文帝方得乘
馬大統十四年進爵平昌郡公廢帝二年拜大將軍兼領
軍及魏帝有異謀言頗漏泄周文以綱職典禁旅使密爲
之備俄而廢帝立齊王仍以綱爲中領軍總宿衛事綱兄
迥伐蜀從周文送之於城西見一走兔周文命綱射之誓
曰若獲此兔必當破蜀俄而綱獲兔而返周文喜曰事平
當賞汝佳口及克蜀賜綱侍婢二人又嘗從周文北狩雲

陽見五鹿俱走綱獲其三每從遊宴周文以珍異之物令諸功臣射而取之綱所獲輒多周孝閔帝踐阼綱以親戚掌禁兵除小司馬又與晉公護廢帝明帝即位進位柱國大將軍武成元年進封吳國公邑萬戶除涇州總管歷位少傅大司空陝州總管晉公護東討乃配綱甲士留鎮京師大軍還綱復歸天和二年以綱政績可紀賜帛及錢穀等增邑以褒賞之陳公純等以皇后阿史那氏自突厥將入塞詔徵綱與大將軍王傑率衆迎衛於境首三年追論河橋功封一子縣公四年薨于京師贈太保謚曰武弟二子安以嫡嗣大舍承末位柱國入隋歷鴻臚卿左衛大將軍

安兄運

運少彊濟志在立功魏大統十六年以父勲封安喜縣侯周明帝立以預定策勲進爵周城縣公歷位隴州刺史再遷左武伯中大夫尋加軍司馬運既職兼文武其見委任進爵廣業郡公轉右司衛時宣帝在東宮親狎諂佞數有罪失武帝於朝臣內選忠諒鯁正者以匡弼之於是運爲右宮正建德三年帝幸雲陽宮又令運以本官兼司武與長孫覽輔皇太子居守俄而衛刺王直作亂率其黨襲肅章門覽懼走行在所運時偶在門中直兵奄至不暇命左右乃手自闔門直黨與運爭門斫傷運指僅而得閉直

既不得入乃縱火運恐火盡直黨得進乃取宮中材木及
牀等以益火更以膏油灌之轉熾久之直不得進乃退運
率留守兵因其退以擊之直大敗而走是夜微運宮中已
不守矣武帝嘉之授大將軍賜以直田宅妓樂金帛車馬
什物等不可勝數四年出為同州刺史同州蒲津潼關等
六防諸軍事帝將伐齊召運參議東夏底定頗有力焉五
年拜柱國進爵盧國公轉司武上大夫總宿衛軍事帝崩
於雲陽宮祕未發喪運總侍衛兵還京師宣帝即位授上
柱國運之為官正也數進諫於帝帝不納反疎忌之時運
又與王軌宇文孝伯等皆為武帝親待軌屢言帝失於武

帝帝謂預其事愈更銜之及軌被誅運懼及於禍尋而得
出為秦州總管至州猶懼不免遂以憂薨於州贈大後丞
十州諸軍事秦州刺史謚曰忠子靖嗣運弟勤大象末青
州總管起兵應伯迴勤弟敬尚明帝汝河南公主位儀同
三司

王軌太原祁人也小名沙門漢司徒允之後世為州郡冠
族累葉仕魏賜姓烏丸氏父光少雄武有將帥才略頗有
戰功周文帝遇之甚厚位至驃騎大將軍開府儀同三司
平原縣公軌性質直起家事輔城公及武帝即位累遷內
史下大夫遂處腹心之任帝將誅晉公護軌贊成其謀建

德初轉內史大夫加授開府儀同三司又拜上開府儀同
大將軍封上黃縣公軍國之政皆參預焉從平并鄴以功
進位上大將軍進爵鄴國公及陳將吳明徹入寇呂梁徐
州總管梁士彥頻與戰不利乃退保州城明徹遂堰清水
以灌之列船艦於城下以圖攻取詔以軌為行軍總管率
諸軍赴救軌潛於清水入淮口多豎大木以鐵鎖貫車輪
橫截水流以斷其船路方欲密決其堰以斃之明徹知之
乃破堰遠退異乘決水以得入淮比至清口川流已闊水
勢亦衰船竝礙於車輪不得過軌因率兵圍而蹙之唯
有騎將蕭摩訶以二十騎先走得免明徹及將士三萬

入并器械輜重並就俘獲陳之銳卒於是殲焉進位柱國
仍拜徐州總管軌性嚴重善謀略兼有呂梁之捷威振敵
境陳人甚憚之宣帝之征吐谷渾也武帝令軌與宇文孝
伯並從軍中進趣皆委軌等宣帝仰成而已時官尹鄭譯
王端並得幸於宣帝宣帝軍中頗有失德譯等皆預焉軍
還軌等言之於武帝武帝大怒乃撻宣帝除譯等名仍加
捶楚宣帝因此大銜之軌又嘗與小內史賀若弼言及此
事且言皇太子必不克負荷弼深以為然勸軌陳之軌後
因侍坐乃白武帝言皇太子多涼德恐不了陛下家事愚
臣暗短不足以論是非陛下相以賀若弼有文武奇才識

度宏遠而測比再對臣深以此事為慮武帝召弼問之弼
曰皇太子養德春宮未聞有過未審陛下何從得聞此言
既退軌謂弼曰平生言論無所不道今者乃爾翻覆弼曰
此公之過也皇太子國之儲副豈易為言事有差跌便至
滅門之禍本謂公密陳臧否何得遂至昌言軌默然久之
乃曰吾專心國家遂不存私計向者對眾良實非宜其後
軌因內宴上壽又將武帝鬢曰可愛好老公但恨後嗣弱
耳武帝深以為然但漢王次長又不才此外諸子並幼故
不能用其說及宣帝即位追鄭譟等復為近侍軌自知必
及於禍謂所親曰吾昔在先朝實申社稷至計今日之事
斷可知矣此州控帶淮南隣接疆寇欲為身計易回反掌
但忠義之節不可虧違况荷先帝厚恩每思以死自効豈
以獲罪於嗣主便欲背德於先帝止可於此待死義不為
他計異千載之後知吾此心大象元年帝使內史杜虔信
就徐州殺軌御正中大夫顏之儀切諫帝不納遂誅之軌
立朝志怨兼有大功忽以無罪被戮天下知與不知皆傷
惜時京兆郡丞樂運亦以直言數諫於帝

樂運字承業南陽清陽人晉尚書令廣之八世孫祖文素
齊南郡守父均梁義陽郡守運少好學涉獵經史年十五
而江陵滅隨例遷長安其親屬等多被籍沒運秣年為人

備保皆贖免之事母及寡嫂甚謹由是以孝聞梁故都官
郎琅邪王澄美之次其行事為孝義傳性方直未嘗求媚
於人臨淄公唐瑾薦之自柱國府記室為露門學士前後
犯顏屢諫武帝多被納用建德二年除萬年縣丞抑挫豪
右號稱強直武帝嘉之特許通籍事有不便於時者令巨
細奏聞武帝常幸同州召運赴行在所既至謂曰卿言太
子如何人運曰中人也時齊王憲以下並在帝側帝顧謂
憲等曰百官佞我皆云太子聰明睿智唯運云中人方驗
運之忠直耳於是因問運中人之狀運對曰班固以齊桓
公為中人管仲相之則霸豎貂輔之則亂可與為善亦可

與為惡也帝曰我知之矣遂妙選官官以匡弼之乃起拜
運京兆郡丞太子聞之意甚不悅及武帝崩宣帝嗣位葬
訖詔天下公除帝及六宮便議即吉運上疏曰三年之喪
自天子達於庶人先王制禮安可誣之禮天子七月而葬
以候天下畢至今葬期既促事訖便除文軌之內奔赴未
盡隣境遠聞使猶未至若以喪服受弔不可既吉更凶如
以玄冠對使未知此出何禮進退無據愚臣竊所未安書
奏帝不納自是德政不修數行赦宥運又上疏曰臣謹按
周官曰國君之過市刑人赦此謂市者交利之所君之無
故不遊觀焉則施惠以悅之也尚書曰眚災肆赦此為過

誤為害罪雖大當緩赦之謹尋經典未有罪無輕重溥天
大赦之文故管仲曰有赦者奔馬之安轡不赦者痤疽之
礪石又曰惠者人之仇讎法者人之父母漢遺言猶云
唯願無赦王符著論亦云赦者非明世之所宜有大尊豈
可數施非常之惠以肆姦宄之惡乎帝亦不納而昏暴滋
甚運乃輿視詣朝堂陳帝八失一曰內史御正職在弼諧
皆須參議共理天下大尊比來小大之事多獨斷之堯舜
至聖尚資輔弼况大尊未為聖主而可專恣已心凡諸刑
罰爵賞爰及軍國大事請參諸宰輔與眾共之二曰內作
色荒古人重誠大尊初臨四海德惠未洽先搜天下美女

用實後宮又詔儀同以上女不許輒嫁貴賤同怨聲溢朝
野請姬媵非幸御者放還本族欲嫁之女勿更禁之三曰
天子未明求衣日旰忘食猶恐萬機不理天下壅滯大尊
比來一入後宮數日不出所須奏聞多附內豎傳言失實
是非可懼事由宦者亡國之徵請準高祖居外聽政四曰
變故易常乃為政之大忌淫刑酷罰非致安之弘規若罰
無定刑則天下皆懼政無常法則人無適從豈有削嚴刑
之詔未及半祀便即遣改更散前制政令不定乃至於此
今宿衛之官有一夜不直者罪至削除因而逃亡者遂便
籍沒此則大逆之罪與杖十同科雖為法愈嚴恐人情愈

散一人心散尚或不可止若天下皆散將如之何請遵輕
典並依大律則億兆之人手足有所措矣五曰高祖斷雕
為朴本欲傳之萬世大尊朝夕趨庭親承聖旨豈有崩未
踰年而處窮奢麗成父之志義豈然乎請興造之制務從
卑儉雕文刻鏤一切勿營六曰都下之人徭賦稍重必是
軍國之要不敢憚勞豈容朝夕徵求唯供魚龍爛漫士庶
從役祇為俳優角抵紛紛不已財力俱竭業業相顧無復
聊生凡無益之事請並停罷七曰近見有詔上書字誤者
即科其罪假有忠謹之人欲陳時事尺有所短文字非工
不密失身義無假手脫有科謬使道嚴科嬰徑尺之鱗其

事非易下不諱之詔猶懼未來更加刑戮能無銜口大尊
縱不能採誹謗之言無宜杜獻替之路請得此詔則天下
幸甚八曰昔桑穀生朝殷王因之獲福今玄象垂戒此亦
興周之祥大尊雖減膳撤縣未盡銷譴之理誠一詔諷善
道脩布德政解兆庶之愠引萬方之罪則天變可除鼎業
方固大尊若不革茲八事臣見周廟不血食矣帝大怒將
戮之內史元巖諫因而獲免翌日帝頗感悟召運謂之曰
朕昨夜思卿所奏實是忠臣先皇聖明知數有規諫朕既
昏暗卿復能如此乃賜御食以賞之朝之公卿初見帝甚
怒莫不為運寒心後見獲賞又皆相賀以為幸免獸口內

史鄭譯常以私事請託運不之許因此銜之及隋文帝為丞相譯為長史遂左遷運為廣州濱陽令開皇五年轉毛州高唐口令頻歷二縣並有聲績運常願覩一諫官從容諷議而性訐直為人所排抵遂不被任用乃發憤錄夏殷以來諫筮事集而部之凡六百三十九條合四十一卷名曰諫苑奏上之隋文帝覽而嘉焉

論曰王熊剛峭有餘弘雅未之聞也情安儉率志在公平既而奮節危城抗辭勅敵梁人為之退舍高氏不敢加兵以此見稱信非虛矣至述不隕明凶亦足稱也王思政驅馳有事之秋慷慨功名之際及乎策名霸府作鎮潁川設

縈帶之險脩守禦之術以一城之眾抗傾國之師卒疲駘之兵當勁勇之卒猶能亟摧大敵屢建奇功忠節冠於本朝義聲動於隣聽運窮蹙蹙城陷身囚壯志高風亦足奮於百世矣尉遲迴地則舅甥職惟台衮沐恩累葉荷瞻一時君形勝之地受藩維之託顛而不扶憂善斯在及主威云謝鼎業將遷九服移心三靈改卜遂能志存赴蹈投袂稱兵忠君之勤未宣違天之禍便及校其心翟義葛誕之儔歟綱運積宣王室勤勞出內觀其自致榮寵豈唯恩澤而已乎夫士之成名其途不一蓋有不待爵祿而貴不因學藝而重者何亦云忠孝而已若乃竭力以奉其親者人



子之行也致身以事其君者人臣之節也斯固彌綸三極
囊括百代當宣帝之在東朝凶德方兆王軌志惟無諱極
議於骨肉之間竟遇淫刑以至夷滅若斯人者人或以為
其不忠則天下莫之信也觀樂運之所以行己之節其有
古之遺直之風乎



北史



列傳第五十

南越文庫

南越文庫

